

***ASO FARAILE, 23 IUNI 2017***

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afoga Mamalu, O Le Ao o le Malo.*

**“TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le maliega i le Fono Aoao Faitulafono na te iloiloina ai le Tulafono Tau Faaofi ua faaalia i inei:

1. Tulafono Tau Faaofi o Teuteuga o le Tulafono o Lafoga o Tupe Maua 2017.
2. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunu 2017.

**TUUINA ATU** i lou nei Lima i lenei aso 22 Iuni 2017.

**(Sainia): Tui Atua Tupua Tamasese Efi  
O LE AO O LE MALO.”**

**FAASILASILAGA MAI LE TAITAI O LE MAOTA**

*Na fofogaina e le Fofoga Fetalai le Faasilasilaga mai le Taitai o le Maota.*

**FOFOGA FETALAI:** E tusa ai ma le Tulafono Tumau 100(2) ua tuuina atu nei le Faaaliga i le Fono Aoao Faitulafono mo le iloiloina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Lafoga 2017.

**23 IUNI 2017**

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

2. Tulafono Tau Faaofi o Teuteuga o le Tulafono o Fua Faatatau o Lafoga o Oloa e Gaosia i le Atunuu 2017.

**TUUINA ATU** i lenei aso 22 o Iuni 2017.

**(Sainia): Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi**  
**TAITAI O LE MAOTA.**

**TULAFONO TAU FAAOFI O LE FAATATAUINA O TUPE 2017/2018**  
**– felafolafoaiga i luga o le faitauga faalua**

**FOFOGA FETALAI:** E tolopo Galuega a le Fono Aoao i le aso Fono ananafi, o faagaso lo tali a le Malo i mataupu sa laga e sui usufono mamalu e uiga i le Tala Faatatau Autu o le Tupe 2017/2018. Ma e tolopo le tatou galuega o lo o saunoa le Afioga i le Minisita o Tupe mo le tali atu i mataupu sa laga e sui usufono mamalu o lenei Palemene.

Ma lou faaaloalo ou te tapa lau Afioga i le Minisita o Tupe ina ia faaaauau lau saunoaga.

**Afioga Hon SILI EPA TUIOTI (Minisita o Tupe):** Lau Afioga i le Fofoga Fetalai, e muamua ona momoli le viiga ma le faafetai i le Atua ua tatou aulia mai lenei aso fou e faaopoopo mai le malosi e faaaauau ai le tatou galuega i lenei aso. Lau Afioga, o se tasi o mataupu sa tele ina lauga i ai sui usufono o le tulaga lea i le atiaeina o le taulaga i Salelologa. Mo le silafia ua uma ona tofia nei e le Kapeneta se Komiti o Minisita e latou te tapenaina fuafuaga uma mo le faatinoina o le tatou taulaga i Salelologa i le tulaga o lo o faataatia ai nisi o lisi sa tuuina atu i pisinisi, o nisi foi o pisinisi sa fai lisi ae le i faatinoina, o le a faapea ona toe aveese mai ae toe faasalalau. A o le sini autu lava o le fuafuaga a le Malo, ina ia mafai ona aumai uma i le taulaga i Salelologa auaunaga uma lava a le Malo, o leoleo, o le Matagaluega o Aoga, o lo o i ai mo le taimi nei, a o faatali le faatinoina o le fausia o nisi o fare o Matagaluega nei. O le a faaaoga le fare aluga o le tatou maketi ina ia faaaoga uma e Matagaluega mo le taimi lenei. O lo o i ai foi le fuafuaga ina ia tuufaatasi uma lava tatou auaunaga i le taulaga ina ia faafaigofie ai mo tatou tagata, ona e tasi le nofoaga e agai i ai e saili i ai auaunaga a Matagaluega eseese a le Malo ina ia faapea ona fesoasoani e faafaigofie ma taugofie ia maua uma auaunaga i Salelologa ia le toe manaomia ai le malaga mai o le tatou motu i Salafai i Apia nei, aua o le a maua uma i Salelologa lea tulaga.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O lo o silasila foi i ai le Komiti lenei i fuafuaga o nisi o vaega o fanua o le Malo i totou o le taulaga, ina ia faapea ona fuafua mo ni kamupani tetele e mananao e faafaigaluegaina a latou tupe i totou o Savaii, o le a fesoasoani tele lea e maua ai ni galuega se tele mo le tatou Motu i Salafai. O lo o i ai le fuafuaga o le a amata faagasolo nei fuafuaga e amata atu i le Tala o le Tupe ua i ai nei le Komiti lenei i fuafuaga o nisi o vaega o le fanua o le Malo i totou o le taulaga ina ia faapea ona fuafua mo ni kamupani tetele o lo o mananao e faafaigaluegaina a latou tupe i totou o Savaii, o le a fesoasoani tele lea e maua ai ni galuega se tele i totou o le motu o Salafai. O lo o i ai le fuafuaga o lea amata ona faagasolo le faiga o nei fuafuaga e amata atu i le Tala o le Tupe ua i ai nei le faiga o fuafuaga ma faasolo atu ai i le tausaga fou. O lo o i ai foi le fuafuaga pei ona fautuaina mai foi e sui usufono i le tulaga lea i le toe tilotilo i ai i le faaleleia atili o le uafu ina ia faafaigofie felauaiga o tatou oloa o lo o maua i Savaii e avatu i fafo ae faapea foi ona faafaigofie ai mo oloa mai fafo ina ia faapena ona tuusao atu i Savaii vaa ma faafaigofie ma taugofie le mea lea o lo o i ai nei o le aumai i inei i Apia lau atu i le auala ma ave i Savaii. A o le fuafuaga ia faamautu le auala ina ia maua mai auaunaga a le Malo ma le faafaigofieina e le gata i le mamalu o le atunuue ae faapena foi i tulaga tau fefaatauaiga.

Lau Afioga sa i ai se fautuaga na tuuina mai faapea e tagatagai i ai i le faatupeina o lenei atinae i le tulaga foi lea o faigapaaga ma faalapotopotoga a le Malo ma nisi mai fafo. Atonu o se fautuaga se i toe tagatagai pea i ai.

E i ai foi le tulaga e lelei ona fesoasoani atu faalapotopotoga tumaoti a le Malo, aemaise lava i tulaga i faalapotopotoga e i ai i le NPF ma le UTOS, ae faaeteete foi i le tulaga lea i le avatu o tupe e faatupe ai le taulaga ae afaina ai foi le vaegatupe e mafai ona faamatuu atu i le mamalu o le atunuue o lo o mananao e nono mai ni tupe e fai ai a latou pisinisi taitoatas. A o le mea sili o lo o tele vaegatupe ma fuafuaga o lo o tilotilo agai i ai ina ia faapena ona vave faatupe ma faagaoioi le atiaeina o le taulaga ma uafu i Salelologa.

Lau Afioga o le isi sa i ai se fesili pe le afaina ai le tau o le eletise i le saofaga fou lea ua tuu i luga o tupe maua a le EPC. E pei ona taua i le lauga, ua uma ona fai i ai suesuega i le tapenaina foi o lenei saofaga fou, e le aafia ai le tau o le eletise o lo o i ai nei. O le faanaunauga lava o le Malo o lo o i ai nei ina ia faapea ona faaitiitia le tau o le eletise i le agai i luma, aemaise lava le tulaga o le tatou solar ma tulaga faapena i le faaleleia o tatou hydros e fesoasoani tele i le tulaga lea ina ia taofiofi le tau o le tatou eletise i se tau talafeagai.

Lau Afioga, masalo na o le pau lea o nisi

**FOFOGA FETALAI:** Malie lau Afioga i le Minisita o Tupe o lo o i ai finagalo e pei ona faaalia e ala i faauiilavea. Tulai mai le sui usufono mo Vaisigano Nu.1.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

**Tofa Lopao Natanielu Mua (Vaisigano Nu.1):** Faafetai i lenei taeao fou i lau Afioga i le Palemia ma Minisita o le Kapaneta. Ou te matau atu o lea o le a faaiu le saunoaga a le Minisita, ou te fia tulituliloaina lava pe le talafeagai pe le alagatatau po o se fautuaga foi ona o lau Afioga e nafa ma mea tau tupe i le tulaga lea o le lending rate lea e ave i le kamupani lea e faia le Tuisamo, e maua i le saunoaga a le Afioga i le Minisita mo Fesootaiga ma Faamatalaga Tekonolosi na o le 1%. A o tatou nei o lea e tau suesue ni auala, a faapea e le mafai ona tuutuu ae i luga, aua le soona tuua i luga, aua o lau aifioga lea e tau saili mai ni seleni e fai ai le mea lea, aua a o i commercial banks, e tilotilo i le fitu po o le valu pasene. Ma le isi mea lau Afioga, se pe le i silasila lelei i le fatu ma le blood pressure o nei kamupani e lua lea e faapaaga ma le tatou Tuisamo cable po o malolosi i te i ua tatou afaina faatasi atu ai. Ma le faaaloalo lava i lau Afioga.

**FOFOGA FETALAI:** Manaia. Malo faafetai. Na ona faamanatu atu i sui usufono mamalu e talifuitau le Minisita i mea sa aafia i saunoaga a le sui usufono mamalu, ma e faapena foi ona tuuina atu e le Nofoa le avanoa i sui usufono mamalu i mea na aafia i a outou saunoaga. E ui i lea, afaei e finagalo le Minisita e tali, lelei. Ae mo le faasaoina o le taimi o le Afioga i le Minisita o Tupe o lo o i ai le isi faauilavea o lo o tulai mai mo Safata Sisifo. Se i tulai mai.

**Afioga Leaana Ronnie Posini (Safata Sisifo):** E leai se agaga e faalavelave i le saunoaga matagofie a le Afioga i le Minisita. Lau Afioga sa ou taua i lau lauga le tulaga lea o tatou tupe faasili aua o lea o le a maea le tausaga faaletupe lenei, e \$23.6% le tatou tupe faasili. O le tausaga lenei 2017/2018, e \$21.3 miliona. Ona ou taua lea e \$44.9 miliona le tatou tupe faasili. Ona e masani ona ou taua ona o lea sa saunoa le Taitaifono o le Komiti o Tupe, e leai ni tupe faasili faapea. Ae o le ala foi lea na ou lagalaga ai lau Afioga i le Minisita o Tupe, aumai se \$10 miliona se i tau faamaea ai auala, e le gata i auala o lou itumalo, a o le tatou atunuu atoa aua e maitau o lenei Maota, e mafuli lava i auala o le tatou atunuu. A o lau maitau i lau Afioga, aua o le tatou tupe atoa lava i le aotelega o le tatou Tala Faatatau o le Tupe lenei, e \$934+ miliona. O lau maitau e uma le tausaga e le i uma ona faaaoga e Matagaluega tupe nei. O lou la talitonuga, e tele atu le tatou tupe faasili nai lo le tupe lea. E mafua lau tala lau Afioga ona e oo i le taimi foi lea o avanoa faigaluega aufaigaluega a le tatou Malo, e le i uma ona faatumu le tele o avanoa. Ou te talitonu lava la e i ai tupe o lea e totoe mai Matagaluega, a faaopoopo la i ai ma le tatou tupe faasili lea, ona ova lea o le tatou tupe. Ma le agaga faaaloalo.

**FOFOGA FETALAI:** Malo faafetai. O se taimi ona tulai mai lea o le Minisita e tali, ae na ona faamanatu atu e le Nofoa ina ia faapena ona tatou toe foi i tua i tatou Tulafono Tumau.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

O le faauilavea, mea fia faasao, faamalamalama ma mea sa laga e sui usufono mamalu i a latou saunoaga, ae le i oo i ai le saunoaga a le Minisita, ae le o se lauga. Na pau o le mea e talosaga atu le Nofoa e le fanaina i le tuitui outou finagalo, a ia aumai na o le agaga autu o le faasaoga, na i lo le toe foi e toe fai se isi saunoaga.

E ui i lea, e faamalulu atu i sui usufono mamalu, a o le manatu, e tuli le tatou galuega ina ia vave. Ou te tapa lau Afioga i le Minisita o Tupe.

**Afioga Hon SILI EPA TUIOTI:** Faafetai i lau Afioga i le Fofoga Fetalai. Ou te tali puupuu atu lava i le fesili i le tulaga o le faatupeina o le tatou submarine cable ma le fesili i le tulaga o le on lending, e pei ona silafia foi sa saunoa le Afioga i le Minisita o le tasi lenei o tatou atinae tele e taua tele mo le atinaeina o le tatou tamaoaiga. O le tulaga lea e i ai, o le faamuamua i le tupe lea na aumai e faatupe ai le tatou o le tatou cable lea ma le faakonekarate atu nei ma le faatinoga, e le o i ai se fuafuaga i le taimi lenei e tuu i ai se on lending, ona o le tulaga foi lea e pei ona taua, e taua ina ia faatino le galuega lenei ma ia tau faaitiitia, e le gata ina tele le capacity, a o le tulaga lea i le faaitiitia o le tau o tatou fesootaiga i le taimi e le aveesea ai le aiatatau a le Malo i se taimi o i luma pe a uma ona faatulaga uma le kamupani ma aiaiga ona toe tilotilo lea i ai i le tulaga e toe fetuunai ina ia i ai se tupe. E faamoemoe foi a i ai se tupe a le kamupani, pe 60% o le kamupani lea e faatinoina le tatou submarine cable o lo o umia e Faalapotopotoga a le Malo e i ai le UTOS, o le NPF, o le SLAC. O i latou la na e maua mai ai tupe maua i le tulaga o dividends ia e totogi ia i latou na ma faapena foi ona totogi mai i le Malo se vaegatupe. Ae mo le taimi lenei, o lo o i ai se tupe faaopoopo i le tului e pei ona aumai e le Asian Development Bank po o le World Bank i le taimi lenei.

O le faafesili i le tulaga lea o tupe faasili, ia silafia foi le tatou lava tupe lea e maua i totonu o le atunu, fua i tupe ia e faaalu i atinae, e i ai le deficit. O le tulaga lea pei e foliga mai e pei o le surplus, o le surplus lea e ala ona maua, ona o nisi vaega o le tatou atinae lea e faatupe mai i tupe ia e aumai e faamama lea e ala ai ona maua le surplus lea. O le tulaga foi lea i le uma o le tausaga e le i faaaogaina le vaegatupe, e pei lava ona masani ai, o le taimi lenei o le tele o Matagaluega ua talosaga atu pe mafai ona faaaoga tupe ia e totoe ua uma ona i totonu o le Tala o le Tupe e toe faatino ai nisi galuega a Matagaluega e le i maea ona fai ma faatau aií O isi mea o le toe totogiina o aitalafu a Matagaluega ia ua leva e le i totogia, lea e ala ai ona faaaoga le vaegatupe lea. O le mea foi lena o lea na le manaomia ai se tatou supplementary estimates, ona o lo o i ai aiaiga i totonu o le tulafono i tulaga o virements ma tulaga faapena e mafai ona faaaoga le tupe lea ina ia uma le tausaga faaletupe, o le tele o le tupe lea na faatatauina ua faaaoga.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

Lau Afioga i le Fofoga Fetalai, masalo o lena ua malamalamā le faiga faavae na tapena ai le Tala o le Tupe. E momoli atu le faamalo ma le faafetai i sui usufono mamalu o le Palestine na faaali le lagolagoina malosi o le tatou Tala o le Tupe, aemaise foi o le tulaga o le faamoemoe o le sini autu ina ia saofaga uma tatou i le faatupeina o le tatou atinae. E momoli atu le faafetai tele i Ofisa Sili o Pulega ma Pule Sili o Matagaluega ma Faalapotopotoga a le Malo ma Ofisa Sinia o Matagaluega sa fesoasoani tele i le Ofisa Sili o Pulega o le Matagaluega o Tupe ma le Matagaluega i le tuufaatasia o le Tala o le Tupe. E le o se galuega e fai toatasī e le Ofisa o le Tupe, o le galuega sa fai sao uma i ai Matagaluega a le Malo ma Faalapotopotoga. O lea e momoli atu ai le faafetai tele i Pule Sili ma Ofisa Sinia i la outou lagolago ma le fesoasoani i le Ofisa o le Tupe. Masalo ana leai le naunau e galulue, tatou te le maua se tupe manaia ma lava tapena e pei ona taatia i luma o le Laulau a Fono.

E momoli atu foi le faafetai tele i le Ofisa Sili o Pulega ma le aufaigaluega a le Matagaluega o Tupe Maua pei ona silafia o le tele o le autu o le tatou Tala o le Tupe i lenei tausaga, o fesuiaiga ia ma le toe fetuunaiga o tatou saofaga. O le tele o lenei galuega sa faifaatasī e le Matagaluega o Tupe Maua ma le Ofisa o Tupe. O lea e momoli atu ai le faafetai tele i le Minisita mo Tupe Maua faapea le Pulega ma le Matagaluega.

Lau Afioga, ona faauma atu ai lea, e fia momoli atu lau faafetai tele i le Ofisa Sili o Pulega o le Matagaluega o Tupe ma le Ofisa aua o latou lea na amata mai lava ia Oketopa o galulue e tapena le tatou Tala o le Tupe, o lea ua oo mai lava i le taunuuga. E avatu le faamalo i lau Afioga Lavea ma le tatou Matagaluega, ia faamanuia le Atua ia te outou ma le faatinoga o le tatou Tala o le Tupe i lenei tausaga.

Lau Afioga i le Fofoga Fetalai ma le mamalu o lenei Palestine, e toe momoli atu le faafetai tele ona o lo outou lagolago, tele fautuaga lelei ua tuuina mai i ni auala e faaleleia ai le Tala o le Tupe mo le agai i luma. E tele fautuaga lelei ma ua maua foi outou finagalo ma nisi o atinae ma ni faiga e tatau ona tilotilo i ai le Malo ma Matagaluega a le Malo ina ia faaleleia atili le tatou auaunaga ma tali atu i manaoga o tatou tagata.

Ma e mulimuli ane, e momoli atu le faafetai ma le faamalo i lou itumalo i lo outou tatalo mai ma tapuai mai ua mafai ai foi ona faatino le galuega. Ia faamanuia e le Atua lau Afioga i le Fofoga Fetalai faapea sui usufono o le Palestine. Ia manuia lenei aso ma le faaiuga o le tatou Fono. Faafetai.

**FOFOGA FETALAI:** Malo faafetai saunoa i lau Afioga i le Minisita o Tupe. Ma ua oo mai le faasologa i le Afioga i le Minisita mo Tina ma Tamaitai, Atinae o Nuu ma Afioaga ma Agafesootai. Tulai maia lau Afioga e saunoa.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

**Tofa Hon FAIMALOTOA KIKA IEMAIMA STOWERS (Minisita mo Tina ma Tamaitai, Atinae o Nuu, Afioaga ma Agafesootai):** Ia e faatalofa aloia atu i lau Fofoga o le Maota i lenei taeao, e piama foi le sui usuofono i le viiga ma le faafetai na siitia e lau Afioga ia aua faamanuiaga a le Atua i le Fonousu a Samoa. E faatalofa atu foi i lau Afioga i le Taitai o le Malo ia ma le aiga Kapaneta, i outou Afioga i Minisita Lagolago, ia aemaise o sui usufono mamalu uma o le Fonousu a Samoa ua potopoto.

E faatalofa atu foi i le paia maualuga o Faauluuluga o Matagaluega ma Faalapotopotoga Tumaoti a le Malo, o lo o faapena ona lima taumatau i ai ia le Malo, i le faatinoina o galuega eseese, aua le faagaoioia o polokalame mo se manuia o si o tatou atunu i ona tulaga aoaotetele.

E faatalofa atu foi i le Tamaitai Failautusi ma lau aufaigaluega a le Fono Aoao Faitulafono o lo o faapena ona tautuaina le Fono i lea taimi ma lea taimi e usuia ai, malo le galalue.

Ia e faapena foi ona faatalofa atu i le Aufaigaluega totofi a le Atua o lo o faafogafoga tapuai mai a o faagasolo le tatou Fonotaga o i latou o i latou o nonomanu ia aua se manuia o Samoa mo a taeao.

Ae le gata i lea e faatalofa atu i le faafogafoga tapuai mai a Samoa i ona tulaga faalupe, amata mai i mauga tetele seia paia maugaiti, o le a oo i ai se faamatalaga. Ia o paia lava mai le vavau e oo i le faavavau.

Ae lau Afioga i le Fofoga Fetalai, ou te tulai ma le faaaloalo, ou te tali atu ma faamalamalama foi nisi o mataupu sa laga e nisi o sui usufono mamalu na afea ai lenei Matagaluega o Tina ma Tamaitai, Atinae o Nuu, Afioaga ma Agafesootai. Ia e le umi foi se faamatalaga aua e na o nai sui usufono e toaitiiti na afea lenei Matagaluega i a latou sausaunoaga.

Lau Afioga i le Fofoga Fetalai e i ai le polokalame lea ua uma ona pilot pe faataitai e lenei Matagaluega i ni itumalo se 4 o le atunu, ia lea sa saunoa faafetai mai ai le sui usufono mamalu mo Lefaga ma Faleaseela ia faapena foi ona saunoa faafetai mai ai ia le sui usufono mamalu mo Alataua Sisifo ia po o le Taitaifono foi o le tatou Komiti o Tupe o le Palemene. Ou te faafetai ona o lipoti ua maua mai i ia itumalo i lo latou fafia e lagolago ma ua latou fautua mai o se mea ua leva ona tatau ona fai.

O le auga ma le....semamanu o lo o faafogafoga mai ia sui usufono mamalu uma o le Fonousu a Samoa, o le a faigofie ai foi le matou talaiga e faagasolo, ona ou te talitonu o lo o faafogafoga mai ia Upolu atoa ma Savaii i le Fonousu a le tatou Malo. O le auga ma le autu o la lea polokalame, ia o se tasi o fuafuaga o le a taulai i ai le Matagaluega mo le atinae o itumalo uma o le atunu i Upolu ma Savaii i so o se tafa. Pei lava ona silafia o le auga autu o galuega a lenei Matagaluega, e mo le atunu, mai lava i alo ma fanau laiti, tupulaga talavou, o tamaitai, o aumaga, se i oo lava i luga o le level o le fono usu a alii ma faipule o lea itumalo ma lea itumalo seia oo foi i le tina ma le tama matua ua pulapula lagoto le soifua, o le focus lea, o galuega a le tatou Matagaluega o lo o fai nei.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O le polokalame la mo le silafia, ina ia oo atu ua faapena ona malamalamo itumalo aemaise outou o alii ma faipule, o se tasi lea o autu ua maea ona ioeina i fuafuaga autasi a lenei Matagaluega mo le 5 tausaga o lumanai ia lea ua maea ona ioeina e le Kabeneta. Ma o se tasi o fautuaga i lea polokalame, ua faatagisia ai ma ua ioeina foi e le Kabeneta, le filifilia o tatou sui mamalu o nuu ma afioaga o itumalo taitasi e taitaifono ma taumafai e aumai i totonu ia taitai o nuu ma afioaga e latou te taitaia polokalame e atinae ai lea nuu ma lea afioaga o lo o i totonu o itumalo taitasi i ona tafa eseese. E mafua ona recommend pe faatagisia le lagolago a tatou o sui usufono o lo o faafogafoga mai le atunu, o tatou na filifilia mai e nuu ma afioaga o itumalo o lo o omai ai i totonu o le Palestene, ia o lo o tulimatai o tatou o lo o fai ma o latou fofoga e faaleo o latou manaoga ma faaleo mea o lo o faapena ona moomia mo le soifua manuia ma le soifua fiafia o tagata uma i ona tulaga eseese.

O le sui usufono o lo o ia silafia le malosiaga o tagata le human resource i totonu o nuu ma afioaga. O faipule o lo o latou silafia alaga-oa o lo o i totonu o lea nuu ma lea nuu o lona itumalo. O mea e mafai ona atinae, o le Komiti la e pei ona fautuaina ai le Taitaifono o a outou Afioaga i sui usufono mamalu, e aofia ai ma Sui o Nuu, Sui Tamaitai o Nuu i so o se nuu lava e i ai foi lo matou itumalo, e i ai le komiti o galuega. A galulue la, pe 4, 5 nuu i totonu o le itumalo, 4, 5 Sui o le Nuu ia po o Pulenuu sa i ai i la aso, 4, 5 Sui Tamaitai o Nuu, ua tele le Komiti, ia ma i latou uma e silafia ia ma o lo o naunau e fia auai i atinae o itumalo. O lea foi fautuaga a le Matagaluega, aua o le a galulue fiafia, o latou o le a pulea a latou atinae, ae le pule atu e Matagaluega a le Malo lea e gasolo atu.

O Matagaluega a le Malo o lo o faufautua o le Soifua Maloloina, Faatoaga, Matagaluega Eseese, ae o le a pulea lava i manao ma mea o lo o moomia e itumalo ona atinae. Silasila mamao po o a fuafuaga e manao ai le itumalo mo le agai i luma, aua e talanoa i lalo la o le faamalumaluga pe a maea ona fono o le Komiti i lalo o le faamalumaluga a le fonousu a alii ma faipule o lea itumalo ma lea itumalo aua o le vaega lea, ia e aumai ai ia le malosiaga o le faipule ma lana Komiti lea aua o lea ua fiafia ua tatou o atu, ia mea ia e manuia ai lo tatou nuu. Pei o le auga lea o ia fuafuaga, ia o mea la ia o le faanaunauga o le Matagaluega, ina ia faapena ona manuia ia fuafuaga uma ina ia maua e lo tatou atunu i nuu ma afioaga i itumalo i Upolu ma Savaii, se soifuaga fiafia, se soifuaga manuia, ia ma ia maua pea e tagata uma mea o lo o moomia aua le tausiga i lea aso ma lea aso. Ia oa pea outou laufanua i mea e atinae, po o a lava isi mea, ona talatalanoa lea, a i ai ni mea o toa ai ni polokalame, e i ai ni faafitauli, tatou talatalanoa. O lo o i ai foi paaga a le Matagaluega o lo o galulue faatasi locally, ia ae faapena foi i paaga mai fafo, atonu e maua ai se fesoasoani, mo nisi o mea o lo o toa ai le atinae ma afioaga. Ia o se faamalamalamaga lena o le polokalame faapena ona talisapaia e itumalo ia e 4, ua maea ona pailate pe faataitai ai lea polokalame.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

Ia ona oo mai ai lea i le sui usufono mo Vaimauga Sasae sa saunoa i le polokalame lea o le Nofotane, e muamua ou te fia faamalamalama ma le agaga faaaloalo, ia o lenei polokalame o lo o taulamua ai le vaega foi lea o le Toomaga mo e Puapuagatia, le Samoa Victim Support Group. Ia e tutoatasi ae o le lagolago, ma le faafetai a le Matagaluega, ona o galuega ia faipaaga o lo o faapena ona galulue faatasi ua silafia e le Maota le tele o faafitauli o lo o tulai mai i lenei vaitaimi ma e o lo o tatou taumafai malosi e saili auala ma saili fofo e mafai ai ona tatou fesoasoani atu, e matua tuuitiitia, ia pe aveesea foi le tele o faafitauli.

E ui la ina e le i lalo o le....ae ou te fia tautala i le matapu lea, leaga ua toatele ia e ua valaau mai ia te au, pe na ou faalogo i le sui usufono ma e leai se agaga ou te ....ae e ao ona faaleo leaga o lo o faafogoa mai le atunu, aemaise o le itupa nei o Tina ma Tamaitai, o lo o ootia o latou lagona aua e tatau ona tulai aua e toaititi le itupa nei o lo o i totolu o le Palestene. Ia faia lou leo ma fofoga o tina ma tamaitai, faletua ma tausi, saoao ma augafaapae, paia ma mamalu ia ou te faaleo o latou lagona. Ua latou lagonaina le 1 amanaia, o le latou sao tele mo le atinaeina o le atunu, e le gata o latou sao i totolu o aiga, sao i totolu o nuu, sao i le atinae o ekalesia, itumalo o le malo ma tulaga eseese e pei ona silafia.

Sa ou kiina i lalo lau telefoni silent....

**Afioga Sulamanaia Fetaiai Tauiliili Tuivasa (Vaimauga Sasae):** Lau Afioga i le Fofoga Fetalai e le faalavelave i le saunoaga a le Minisita,

**FOFOGA FETALAI:** Malie le Minisita, se i tulai mai le sui usufono o le Vaimauga i Sasae,

**Afioga Sulamanaia Fetaiai Tauiliili Tuivasa:** E i ai le manatu o le sui usufono o Vaimauga Sasae lea sa talanoa i ai, pei o le agaga tonu lava lena e leai se agaga e faaleaga le tulaga i le nofotane, ae o le agaga tonu lava lea ua aumai e le Minisita, o le faaaogaina o tina nofotane e sue ai le tupe e promote ai. A la lea la ua maua i le taeao i le saunoaga, e le o sau le tupe i totolu o le faalapotopotoga lea, o le agaga lena. E leai se tulaga faatauvaa ai le vaai i le nofotane, ae o le faaaogaina e le polokalame o nofotane, a faapea ua faaaoga nofotane se i tulou lau Afioga, aumai le tupe ave sao lava i fafine nofotane. Lea la ua maua i le saunoaga a le Afioga i le Minisita, e le o sau le grant lea po o le faamanuiauga lea mai le UNDP po o fea, e alu i totolu o fafine nofotane. O lea e faaaoga lava le polokalame lea e nisi o lea ou te tatalo atu ai, faasau le polokalame ia i tupe ia e aumai e ala atu ia te oe ona e tufatufaina lea i totolu o afioaga, ona sao laia. A o le faaaogaina la o nofotane ae le sau i totolu o le Malo e ese tagata la e pulea, o le agaga lena lea na popoe i ai le sui usufono. Ua aumai fafine nofotane e faaaoga i ai le tamaoaiga lea ae le inu ai ni fafine nofotane sei tulou lava le faafogoa pei o se tulaga lea, ou te le o faavaai faatauvaa ae o le faaaogaina o nai fafine nofotane, e aumai ai le seleni e benefiti ai isi Vaega, ae o lea la ua maua.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

Ou te tatalo atu i lau Afioga i le Minisita, ia i lalo o lau vaaiga tupe ia e aumai e faaaoga ai poloketi ia, ia faasoasoa ai ma le tatau, inu lava fafine nofotane ia i le faaaogaina o latou tupe. Ia manuia le Fono.

**FOFOGA FETALAI:** Ia se i tuu atu i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia):** Lau Afioga i le Fofoga Fetalai, ua agai ese le tatou Fonotaga ona o mea foi ia o emotions mo manatu e le faavaea, ona agai sese ai lea o le tatou Fonotaga, a o tupe ia a le United Nation, e le aumaia e tufa ni tupe faapena. E ala la ona tatala mai ia seleni na, ona o le latou fiafia e fia malamalamama, ae o lona uiga e mo le faatalanoaga, a o mea faapea.

E leai se mea e eseese ai ma le mea foi lele ua teuteu ia tatou Tulafono, o lea toatele ia tamatai o le tafe mai o le tupe, ae o tupe na e fai ai a latou fono e inu ai a latou ti ma fai ai a latou fagogo. Ia o lea la na ou alu ai ou fai vaai ana le faia a outou fagogo faapea, e le i aumai ni tupe e fai ai tou ti ma tou talatalanoa ai ma tou faitatala ai, ia o le mea lena na aumai ai tupe. E le i aumai e ave e tufaina i tua na aumai e faatalanoa ma faamalamalamama aua o faalapotopotoga nei, o faalapotopotoga foi ia e omai ona faalogologo lea, faalogologo e fia iloa ma fia malamalamama po o a ia a tatou tu ma agaifanua. E fiafia la vaega ia e o e fai tala faapena, fai tala faapena, aua e atili ai ona toe sau seleni.

Ou fai lea i tina ia, vaai toaaga e fai la outou talaiga lena, aua a le faia la outou talaiga lena e le tafe mai le tupe lea ma build up ai le tatou forum reserve. Ae le i aumai ni tupe faapena e tufa, o le atamamai lava o tina ia, lea na atili matau ai le tafe mai o le mea lea, ia ma feoai ai ma fai ai ia latou tala, e uiga i o latou taitoalua, aua a alu atu foi ua sauaina ua atili ai ona fiafia le vaega lea e faatafe mai le tupe i totonu.

O le mea lena o lea ou te fautuaina ai le Minisita, aua le seetia, aua le seetia i le valaau mai, mo mea o le faaaliga o mafaufauga nei, a o le tau faapea ua le amanaia le galuega, ua tele tele lena upu. Ia o le a le amanaia le galuega a le fafine nofotane, o latou lea ua pulea le nuu, o tagata uma lava e nonofo i fafine mai fafo o lea ua pulea le nuu, aua na ona fai mai lava o le fafine, a le faia le mea lea ou te manao ai, e te fiu e toe mailei mai au e fai se ta lotu, lau Afioga i le Fofoga Fetalai o le mea lena, aua le seetia fua, ae faagasolo lau lauga o le a tuai.

**FOFOGA FETALAI:** Ia, atonu ua manino ma malamalamama foi le faauilavea ia, ia faafetai atu i le Afioga i le Palemia ua manino auofala ae saunoa ia lau Afioga i le Minisita.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

**Tofa Hon FAIMALOTOA KIKA IEMAIMA STOWERS:** Ia faafetai lava mo le tulai mai o le Taitai o le Malo, ia o lena ua faamanino ma faamalamalama ia mea ia o tupe aua e le o au o se tagata tau tupe. Ae e faataua ia te au le tagata ma lana auaunaga, ia ma lona sao i le atinae o le atunuu lea matou te galulue ai. Pau lava le mea na ou taumafai atu ai, ona o upu na lafo, *‐ou te le lagolagoina le polokalame, o le nofotane lava ia o le nofotane, aua a le tu i le tofi, fafo ma le maafala*'. O upu ia lea na ou taumafai atu ai, ae o le a faauma ai i se tala, faafetai i le Afioga i le Minisita ia Laauli aua o ia lea sa valaulia e le Samoa Victim Support, e lauga i le lauga autu na launch ai le polokalame lea, o le nofotane.

Lau Afioga i le Fofoga Fetalai ma le Taitai o le Malo ma le paia ma le mamalu o lo outou itupa malosi, faamolemole ou te faamalulu atu i lau upu o le a lafo atua e toe faafoi mai pe a outou toatamai, o tatou uma lava o nofotane. Aua e nofotane matou, ae faiava outou.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai e le faalavelave i le saunoaga a le Minisita, ona o lea ua aumai le tulaga i le nofotane. Ou te alofa tele i le Afioga i le Sao Faapito, e pei o le agaga lena, ona o lea e fai mai o tatou uma lava o fafine nofotane, ae le i nofotane le Afioga i le Sui Palemia ma lou faaaloalo lava.

Ae o le tali o lau mataupu lau Afioga lea ua tali ai le Palemia, o nofotane o latou nei ua faia nuu, ua pule i latou i nuu, ae taitai e tatou o matai o nuu. E pule ai pea ia fafine nofotane, aua e taitai e tamaloa i le faiga o nuu, ae o lona toalua, vaega o tina, e pule latou i totonu, ae ou te le o faatauvaina. Ua popoe le Afioga i le Sao Faapito, leaga o le Sao Faapito o le Sao Papa, o le Sao Falenaoti ae lea ua fai mai o tatou o outou uma o fafine nofotane e le i nofotane le Sao Faapito.

**FOFOGA FETALAI:** Ia.

**Afioga Hon Fiame Naomi Mataafa (Minisita mo Punaoa Faalenatura ma le Siosiomaga):** Faafetai tele lava. Lau Afioga i le Fofoga Fetalai, ona ua taua lota igoa, ai a o le mea lea o le fai o le misa a isi ae lavea ai fua le isi. Ae sao lelei lava, lau Afioga i le sui usufono o Vaimauga Sasae, ia atonu o le mea foi lena e le i faia ai sou toalua, ioe i le tele o lena ave e tauave, talofa e i nai nofotane Ia manuia le tatou Fono.

**FOFOGA FETALAI:** Faafetai ua maua atu foi e le Nofoa le finagalo o le sui usufono na faauilavea Vaimauga Sasae. O lea foi ua malamalama le saunoaga a le Sui Palemia, ia e lavea le Sui Palemia i mea uma e lua. O le mea la lea, ia tulai maia lau Afioga i le Minisita.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

**Tofa Hon FAIMALOTOA KIKA IEMAIMA STOWERS:** Faafetai i lau Afioga i le sui usufono, ia le tatou mafutaga i totolu o le Maota ia o le avafatafata ma le faaaloalo, ia ae pei na ona tuu atu pea, aua e i ai taimi e pei e faatausua ai a tatou faamatalaga ae galo ai ia tatou o lo o i ai ia le au faitau upu ma le au faitau laulu. Ia o le a ou see ese ma le tulaga lea, ae faafetai i le Minisita, i lana fesoasoani mai, atonu o se faaupuga mania i le faalogona, o tatou maupaolo tamaitai ma paolo alii, ia ae pei ua maualalo tele ia upu o le nofotane ma le faiava, ia ae o le a ou see ese ma le tulaga lea.

Ona ou oo mai lea i le sui usufono mamalu mo Alofi Aana Nu.2 sa saunoa i le tele o lapisi o lo o paepae solo atoa ai ma le aufai lapisi i totolu o nuu ma afioaga, ia o lo o le manaia lea vaaiga tatou uma lava, ia atonu o lena foi na saunoa ai le Afioga i le Palemia i le aotelega o galuega a sui o nuu, faapena i le tulaga o le tumama lautele i nuu ma afioaga, i le faamamaina o lapisi ma tulaga ia, o lo o ave pea le faamanatu i Sui o Nuu ma Sui Tamaitai o Nuu. O latou o lo o totogi e le Malo, o le aufaigaluega ia a le Malo i totolu o nuu ma afioaga, ua maea ona sauna e le Matagaluega a latou faila, e pei o ni Tusi Paia o lo o faapena ona tau i ai, faailoa i ai i lea taimi ma lea taimi ia a latou matafaioi ia ma galuega e tatau ona silasila i ai.

Ia ma e le o mapu le Matagaluega, o le ala foi lea atonu o la e faafogafoga mai nuu ma afioaga, talu ai nei lava na avatu ai le faasalalau i le matou Matagaluega sei toe silasila ane lava le pulega mamalu a alii ma faipule i le tofia mai lea o a tatou Sui nei ua taua o Sui o Nuu faapena foi i komiti o Sui Tamaitai o Nuu. O le mea lea e tupu nei, o le tele ia o le faafitauli o le tulaga lea, o le ala foi lea o le tomanatu i le polokalame lea na ou faamatala muamua, ona o lo o tele faafitauli i i. E uma nei ona pasia e le Kapeneta le pepa ua avatu e le Matagaluega ua filifilia sui ia ua tai tolu o lea ua toe filifilia mai ae tasi lua masina ae toe tutu mai isi toeaiina o lea nuu, *„faamolemole lau Afioga i le Minisita ua matou omai e aveese lo matou pulenuu, leai ma se galuega o fai”*. O upu lava nei ou te le alo, o lo o talanoaina pea ma ou tautala ai i totolu o fono a nuu i Upolu faapea ma Savaii, ou te faafetai ai foi i le galuega fita a le Minisita Lagolago o lenei Matagaluega o lo o tuu i ai ou tiute pe a le avanoa, o lo o pese pea ma taulogologo le taua o tiute nei, ina ia filifili mai tagata o lo o malolosi, filifili mai le tagata vae mama ma toaga, o lo o i ai le loto e galue aua a sese mai le filifiliga, ua oti atoa lava i i le tou nuu e leai ni faamanuiaga o maua.

O le tele o taimi e vili mai isi nuu, o le a le mea ua taunu mai ai le Ofisa lea pe taunu atu le isi Matagaluega pe na o le toaono, valu, e le talaia e le pulenuu ia polokalame ia, o la e faafogafoga mai ia pulenuu e le o alo ai faamatalaga i le taimi e fono ai. Ia so o le tulaga lena o le tulaga lea e pei ona taua foi i galuega ia, e filifili mai sui e lelei ai ma sologa lelei ai polokalame ma atinae aua nuu ma afioaga.

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

Ona ou oo mai lea i le sui usufono mamalu mo Anoamaa Sisifo, sa taua ai e le sui usufono pe le mafai ona fesootai sao direct actions e faatalanoa i aiga o tamaiti faatauoloa ia i auala. O le tausaga na tea nei na amata ai le polokalame i se tulaga faataitai, pilot a le Matagaluega nei foi, e taua o le taumafaiga e lagolago ai fanau Supporting Samoas Childrens Initiative. O lea la na amata galulue mai lava, tuu sao e le Matagaluega i aiga o lo o i ai matua ma faatalatalanoa mafuaaga eseese o faigata ai ma tuuaia lava o le mativa lea e mafua ai ona o e fai le mea lea ae le ave tamaiti i le aoga. Ua talanoa la ma le Matagaluega pe a ma le sefulutasi aiga na faapena ona la ua foi tamaiti e o i le aoga, a ua faapena ona fesoasoani i ai le Matagaluega, i le atinaeina o nai pisinisi laiti e ala i ni nai fasitupe laiti o lo o aumaia i ai latou o lo o faipaaga ma le Matagaluega e fesoasoani ai ia latou. O la ua fifafia matua ua maua le fasitupe o la ua o tamaiti i aoga, ae tele ma anoanoai ia mafuaaga eseese ia ae i le tilotilo a le Matagaluega i faamatalaga o lo o aumai, ia o lo o faapena lava, o totolu lava o aiga, a lelei ona foafoa mai ia fanau i totolu o aiga, e matutua ifo e oo lava i le tulaga e faapena ona lagolago ia tatou ia tatou fanau auu sa lelei ona tatou fuafua.

Ia o le sui usufono mamalu mo Faasaleleaga Nu.2, sa taua o lo o i ai ni vai se fitu o lo o i totolu o le itumalo o lo o faaaoga foi i le atunu ma o lo o fia maua ai se fesoasoani mo le faaleleia. Ia lau Afioga i le sui usufono o le itumalo, o vaiaso uma o lo o o atu ai ia asiasiga, lea vaega ma lea vaega o le Matagaluega, o lo o faafogafoga mai le Pule Sili o lenei Matagaluega ma le aufaigaluega o le a afea se i vaavaai le tulaga o i ai, lipoti mai, ma tatou fesootai po o le a se fesoasoani mo le atinae o ia foi tulaga aoga i totolu o le Matagaluega.

O le sui usufono mamalu mo Falealili Sisifo, o lea na saunoa le sui usufono o lea ua pasia ia le Tulafono o Fono a Nuu le Village Fono Act, pe le mafai ona faaaoga le Tulafono lea ua ave i ai le malosiaga i Alii ma Faipule i totolu o afioaga e fai ai ni faasalaga ina ia tuuitiitia ai le tele o faafitauli ma solitulafono eseese o lo o faapena ona tulai mai i lea taimi ma lea taimi. Lau Afioga i le sui usufono o le Maota, o le tulaga tonu lava lena o lea ua agai i ai le Matagaluega, o lea o le a faasolsolo atu i nuu ma afioaga e avatu ai le talaiga i le fono lea aua o le fono lea matou te talitonu e ala i le matou o atu vaai, tilotilo, faalogo i le latou faamatalaga, ia o i o lo o i ai ia le malosiaga e tuuitiitia ai le faafitauli lea e tutupu mai i nuu ma afioaga.

O le tilotilo foi a le Matagaluega, o lo o feololo lava le maopoopoga o nuu ma afioaga i tua faapea foi si o matou motu tele i Savaii, ae pei o le shift mai o le toatele i le taulaga i nuu tu taulaga lea ua matou talitonu, ma e o lo o faafetai ai foi i le Matagaluega o Leoleo, faafetai i le lagolago mai a le Aufaigaluega a le Atua i nuu tu taulaga nei na matou savalia faatasi ma leoleo, matou talanoa i faifeau, ua vaaia le toe maopoopo mai o nisi nuu sa tutupu ai faafitauli.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

Atonu e momoli atu ai le faafetai lea ua toe vaaia i nisi o nuu tu taulaga i le pule mamalu a alii ma faipule ona toe faia a latou vavao i taimi o faigalotu atonu o le a toe alu alu ai i se tulaga faapea pe a maopoopo pea ia pulega lelei a tatou o matai ma le aumatutua o pulea ma vaaia totonu o nuu ma afioaga.

Ia ona faaiu atu lea pei ona talanoa mai le sui usufono mamalu mo Aleipata Itupa i Lalo, faafetai tele mo le fesoasoani a lau Afioga ua faailoa mai ua maea soalaupule e ala i se feiloaiga i le mataupu foi i nisi o afioaga o le itumalo, malo le fai o le faiva. Ua faatali foi le Matagaluega e tusa ai o le feiloaiga, ia e faapena lava ona naunau le Matagaluega i le nofo filemu ma le nofo fealofani, aua a filemu ma fealofani i tatou o lo o pulea nuu, e faapena foi ona manuia lautele ia nuu ma afioaga ma Samoa i ona tulaga faalupe ma ona tulaga aoao tetele. Ia ou te talitonu na ona pau ia o tulaga sa sausaunoa i ai ia sui usufono sa....

**FOFOGA FETALAI:** Ia se i tulai mai le sui usufono mo Safata Sisifo, malie le Minisita.

**Afioga Leaana Ronnie Posini:** Faafetai i lau Afioga i le Fofoga Fetalai, e leai foi se manatu e toe faalavelave i le saunoaga matagofie a le Afioga i le Minisita, leaga sa ou laga i lau lauga lea sa saunoa ia le Minisita o tagata tafafao mai e le fitoitonu i lana Afioga le tulaga lea i le faamamaina o le tatou taulaga, lea sa ou laga i le tatou uafu lea i Matautu. E i ai le taimi lea e taunu mai ai ia meli foi ia, lea sa ou fai atu i le tulaga foi lea i le fai otaota i faleaiga ma falekalapu i gatai o Matautu, aua o le tele o tagata tafafao maimoa mai fafo, e savavali mai e fia savalivali mai, ae o lea na maitau ai le tele o lapisi ma le faaotaota i falekalapu ma faleaiga, ia pe leai se tuualalo a lau Afioga pe fautuaina ia faleaiga ia ma falekalapu ina ia fai ma o latou tiute e faamama aua e taua i lata ita ia matau ona o i le uluai vaaiga lea i le tatou atunu ma le agaga faaaloalo.

**FOFOGA FETALAI:** Ia se i tulai mai le Minisita

**Tofa Hon FAIMALOTOA KIKA IEMAIMA STOWERS:** Faafetai i le sui usufono i le faamanatu mai o la lea tulaga. E saolele lava le saunoaga, ia ma sa i ai le taimi sa talanoa ai foi ma faailoa mai e le pulenuu foi o Apia le Afioga ia Tuiletufuga o le latou galuega lea sa masani ona fai ma le aumaga ma tupulaga talavou, ia ao le isi vaega e tatau ona fesoasoani i le vaega lea aemaise a tai i le taulaga, e tatau ona tilotilo i le Komiti lea o le Ava Malosi, i falekalapu ia aua e pei o lo o i ai ia lipoti foi o le tele o le lapisi lea o le po, ia o lea e tatiai mai i i. Ia o le a silasila totoa i ai tulaga i ai latou o lo o faapena ona faalapisi, ia ua tatau ona molia i le Tulafono.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

Lau Afioga i le Fofoga Fetalai, ia ua uma ai foi mataupu sa laga e le sui usufono mamalu, ae ou te toe fia afea sina minute e tasi i le tapuaiga a si ou itumalo. Faafetai i si ou itumalo i ona tulaga faalupe i le afifio o Sao e Fa, ma le aiga Sa Umalau, Leatitogiu ma le Faasau, lau fetalaiga i le tulafale Lavea na e mua i malae aua le puipuiga o le malae i Finao, ia le tatou nuu pito mai nei o Manase, le susu o Taito ma le fetalaiga ia Tauasa, malo faafetai le tatalo, faafetai le tapuai, mafanafana le loto ou te talitonu, ona e le o faagaloina foi i la outou tuualalo e le mafai ona ou toe lauga ai mea sa o tatou talanoa, o lo o tuitui pea i Afioga i Minisita nei, taatia maia, e faapena ona tatou talosia le alofa o le Atua e faamanuia si o tatou itumalo, aemaise foi le Aufaigaluega paia a le Atua o lo o faapena ona tatalo i le po ma le ao aua se manuia o Samoa mo a taeao.

Lau Afioga i le Fofoga Fetalai, manuteleina le Fonousu a Samoa. Soifua.

**FOFOGA FETALAI:** Malo, faafetai i le saunoaga matagofie a le Afioga i le Minisita, ia ma ua oo mai le faasologa i le Minisita mo Tupe Maua.

**Afioga Hon TIALAVEA FEA LENIU TIONISIO HUNT (Minisita mo Tupe Maua):** Faafetai i lau Afioga i le Fofoga Fetalai mo le avanoa, faapea foi le Fonousu a Samoa aemaise foi le atunu o faafogoa mai i lenei taeao. Ae talitonu o le a tuu sao le mataupu e tusa ma mataupu na laga mai e sui usufono o itumalo o le tatou atunu.

E fitu sui usufono sa laga maia mataupu e faatatau i Matagaluega o lo o i lalo o lau vaiga i le taimi lenei. O Falepuipui ma le Ofisa o Lafoga. O le Falepuipui i le taimi lenei o la ua faagasolo le tauofoga o le fausiaina o le Falepuipui fou i Tanumalala. Ma o le vaiaso fou masalo e tatau ona oo atu i le Komiti o Tauofoga le faaiuga o le valuation o lo o fai nei e le Project Manager ma le Komiti o lo o gafa ma le faatinoga o le galuega lea i Tanumalala. O le vaiaso fou e talitonu e tatau ona taunu atu ai le faaiuga o lea tauofoga. Ma o se galuega e le faigofie le galuega lea o le a faatino. E talitonu foi e leai se mea e le mafai ona fai. E pau le agaga ona o le Tala o le Tupe o lo o aumai o lo o i ai le \$3.8milliona o lo o faaagaaga mo le galuega lea, e talitonu e le o gafatia le galuega ne i te i ua alu alu poloka, ae e le afaina o lea ma te soosoottauau ma le Minisita o Tupe e le mafai ona poloka le galuega lea, ina ia mafai ona faaumaina i le tausaga fou. O galuega fai foi a le Falepuipui i le taimi lenei o lo o gasolo lelei, faafetai atu ai i le Komesina ma le paia o le aufaigaluega e tusa ma lenei vaitau i le faagaoioiga o le Falepuipui. O lea lava ua silafia ua seasea lava toe i ai ni faafitauli o tulai mai, ina ua mafai ona talanoa ma fono ma e foi o lo o nofo vaavaaia i uta i le nofoaga lea. O le taimi nei ua matua tumu lava, e le natia lea tulaga ua i ai. Ua ova i le 500 pagota po o e o lo o nofo vaavaaia i uta i le falepuipui i le vaitau lenei. E vave tele le o atu i uta ae tuai le o mai i fafo. Ona o le tulaga o lo o i ai le Falepuipui tuai, o le ala lena o le taumafai o le Malo e fausia le nofoaga fou i Tanumalala ma o lo o lava foi le fanua e fesoasoani i le fofoga taumafa o le Falepuipui pe a agai i Tanumalala i le lumanai.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

Ona ou oo mai lea i le Matagaluega o Lafoga o Tupe Maua. O le a ou le tali atu i sui usufono na saunoa i le sao o faafeagaiga, leaga e le i oo mai le Tulafono. E tasi le sui usufono sa talanoa i le tulaga lea, ia e le i oo mai le Tulafono i le Maota Fono nei. A o le sui usufono lea sa faamaualuga lou loto o ia sa galue e ova i le 30 tausaga i le Matagaluega o Tupe Maua, e i ai lona tomai faa-aolafoga, ae talitonu se i oo mai le Tulafono ona ou tali atu lea ma auiliili atu le tulaga lea. O le manaomia o se Falepuipui i Letogoí .

**Afioga Sulumania Fetaiai Tauiliili Tuivasa:** Lau Afioga i le Fofoga Fetalai e le faalavelave i le saunoaga a le Afioga i le Minisita, o lou faanaunauga foi lea ma lou faamoemoega lea.

**FOFOGA FETALAI:** Malie lau Afioga i le Minisita, se i tulai mai le sui usufono mo Vaimauga Sasae.

**Afioga Sulumania Fetaiai Tauiliili Tuivasa:** O le pou autu foi lea o le Malo o lo o faatuatua i ai ona o le Matagaluega lenei o le 90% o le paketi o lo o ao mai, a o lea ua maua lea faatoa ofi atu le Afioga i le Minisita, a o lea ua afea ai nai faafeagaiga. O lona uiga ua vaivai le auaunaga i le aoina o le lafoga, e pei o le agaga lea. Ona o lea ua fai mai, ua tau mai au sa faatuatua i ai, ae sa ou faatuatua e ao mai lafoga ae ou te le i lotea le au faafeagaiga, e pei o le ala lea lau Afioga i le Taitafono.

**FOFOGA FETALAI:** Tulai mai lau Afioga.

**Afioga Hon TIALAVEA FEA LENIU TIONISIO HUNT:** Faafetai i le manatu faaalia e le sui usufono ua tulai mai. O lea e ia te au le galuega fita sa feagai ma le CEO talu ai aemaise foi le Minisita talu ai o le Ofisa o Lafoga. O le tausaga 2011 e \$420milliona o le 2012 e \$377milliona, 2013 e \$409milliona, 2014 e \$421milliona, 2015 e \$431milliona, faamavae loa le sui usufono lea \$485milliona, i le taimi lenei ua \$450milliona i le sefulutasi masina. E momoli le faafetai i e ave i ai le faafetai. E le o se malosi o au ma lau Minisita Lagolago e leai, o le malosi o le Pule Sili, Pule Lagolago seia oo i le o lo o leoleopo i le Matagaluega lea e tofu sao i le tupe maua. E pei ona fai atu e ave le faafetai ia i latou o lo o galulue i le po ma le ao. E pau le matou galuega o lo o fai o lo o matou fautua ma fesoasoani i le latou pitolaau ina ia suesue auala uma e mafai ai ona maua mai tupe aua le atinaeina o le tatou atunuu. E leai ma se sui usufono e le i lauga i le Minisita o Galuega ananafi, manaogái .

**Afioga Sulumania Fetaiai Tauiliili Tuivasa:** Lau Afioga i le Fofoga Fetalai leaga o le tuuaiga lea e fai mai na ou alu ese loa ua oso ai i luga le tupe e ao. E nofo atu lava e le logomalie le saunoaga a le Minisita e pei sa ou i ai, a o lea ua ou alu ese loa a o lea ua oso i luga e pei e foliga e tele le tuuaiga.

**23 IUNI 2017**

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

**FOFOGA FETALAI:** Malie lau Afioga i le Minisita, e pei e matuia. Se i saunoa mai.

**Afioga Sulumania Fetaiai Tauiliili Tuivasa:** Ae lau Afioga i le Minisita ma le Minisita Lagolago, se i fesili lava i le Pule sili. O lo o i ai le matatia a le sui usufono lenei, le sui tuai lenei a le Matagaluega o Lafoga e \$1.5milliona sa aoina mai i le tasi le payment. O lo o i ai nei i le Ofisa o Lafoga le faamaumauga lea, o le matatia lea a le sui tuai lenei, \$1.5million one payment. Fesilgia lea tulagaí .

**FOFOGA FETALAI:** Malo. Ailoga o toe maua nei faamaumauga tuai.

**Afioga Hon TIALAVEA FEA LENIU TIONISIO HUNT:** E sao lelei le sui usufono.

**Susuga Hon Tuilaepa Auelua Fatialofa Luplesoloai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalaií .

**FOFOGA FETALAI:** Se i saunoa mai le Palemia.

**Susuga Hon Tuilaepa Auelua Fatialofa Luplesoloai Lolofietele Neioti Aiono Galumalemana Dr. Sailele Malielegaoi:** E le o se mea foi e vevesi ai tatou, ae na tau mai lava e si toeaina le mafuaaga, e musu e lote isi ae na o isi e lote. O le mea lena o lea e tupu ai le faalavelave, e i ai tagata e le i lotea e le toeaina.

**FOFOGA FETALAI:** Saunoa maia le Minisita, e le afaina e lelei foi le see ese se i oo mai le Tulafono

**Afioga Hon TIALAVEA FEA LENIU TIONISIO HUNT:** E momoli atu le faafetai i le galuega a le sui usufono lea i le \$1milliona lea na maua ae lei maua le target o le tausaga. Ae faafetai mo le galuega sa feagai ai. O lea ou te tautala au i fuainumera ia ma tausaga, 2016 ina ua sui usufono le sui, a o lea ua \$485milliona na aoina. Ou te le i fai atu e faaletonu e leai, faafetai i le 30 tausaga sa galue ai ma le faamaoni i le Ofisa o Lafoga. Ae pei ona fai atu lau faamatalaga lau afioga i le Fofoga Fetalai, o le a ou agai i le isi mataupu.

E i ai le sui usufono na saunoa mai pe le tagatagai le Matagaluega i le faatuupa o le pia, ona o le vaitau lenei ua tele ina fai misa i totonus o falekalapu ona faaaoga ai lea o atigifagu e fai ai misa ia. O le matou galuega a le Ofisa o Lafoga matou te tilotilo foi ia matou paaga o lo o mafai ona maua mai ai le seleni o lo o fai ai a tatou galuega. Aemaise la le tulaga lea o le toe tasui uma lava o fagu i apa.

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

E tele se tupe a ia foi Faalapotopotoga aemaise foi fale gaosi ava o le a toe faaaluina. E fai foi o le manao o le Malo i lafoga ae a toe tuu atu ma lea ua atili ai ona, ae e le o le fagu le mafuaaga lau afioga e ala ai ona feoai fagu ia i luga, o le pa pia. O le e ona le pa, e tagai atu lava le pameni ua ona le tagata lea, ae ave lava i ai le pia. O le iuga o le tulaga lena o le feoai o atigifagu ua ova le ona, ae o la e i ai le Tulafono e le mafai ona faatauina se pia i se isi ua silafia ua ova le ona o mai lea i fafo faapapa fana ai fafo i le pa.

**Tofa Olo Fiti Afoa Vaai (Salega Sisifo):** Lau Afioga i le Fofoga Fetalaií .

**FOFOGA FETALAI:** Malie lau Afioga i le Minisita, se i tulai mai le sui usufono mo Salega Sisifo.

**Tofa Olo Fiti Afoa Vaai:** E pei e le o seí .sa avatu lava le mataupu mo le agai i luma e le o le taimi nei. A o lea ua tuuaia ia e o lo o faia pa pia. Malie le Afioga i le sui usufono mo Faasaleleaga Nu.2 i le saunoaga a le Minisita, o lea ou te vaai atu e fai ma e tagai mai i le sui usufono mo Faasaleleaga Nu.2 ae e te le o silasila lelei mai ia te au.

**FOFOGA FETALAI:** Tulai mai le sui usufono mo Faasaleleaga Nu.2.

**Afioga Pau Sefo Taumata Pau (Faasaleleaga Nu.2):** E tulai atu ma le agaga faaaloalo ona o lea ua taua, faafofoga foi lou itumalo. O le mea lava lea ua ou le toe faia ai lea mea o le pa pia, ma e ono afaina fuafuaga. Ma o le laisene o le pa pia e le o laisenea ia te au, o la ua i ai lau fanau ua ou pasia i ai. Ua ou le toe tagofia ia mea o pa pia e tutupu ai faalavelave ma tauvalea ai lou tagata, o lea ua ou malolo mai ai. Ao e foi e, ua tatau foi ona faamalolo ma le sui usufono ae o e fai pa pia. Ma lou faaaloalo lava.

**FOFOGA FETALAI:** E manaia foi le fautuaga, o ai lava le sui usufono e o fai pa pia faamalolo loa. Saunoa maia lau Afioga i le Minisita.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai, ou te vaai atu e toatolu le au fai pa pia lea e sosoo mai i le itu lea. Ae pei o lena ua faaali atu se manatu e leai o le tuuapa pe tuu atigifanu e leai, o le control lava i totonu o le e ona le faleava. Faafetai i le sui usufono mo Faasaleleaga Nu.2 ua alu ese mai ma le pa pia, ia o lea ua malosi ia le sui usufono mo Faasaleleaga Nu.2, a o lea lava e gasegase mai ia le sui usufono mo Salega Sasae. Ae taatia sei talanoaina pea lea mataupu, ae faafetai mo le fautuaga.

O le isi sui usufono na fesiligia le pacer plus.

**Afioga Pau Sefo Taumata Pau:** Lau Afioga i le Fofoga Fetalaií .

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

**FOFOGA FETALAI:** Tulai mai le sui usufono mamalu mo Faasaleleaga Nu.2.

**Afioga Pau Sefo Taumata Pau:** O lea ua saunoa le Afioga i le Minisita i le au fai pa pia lea ua i ai nei. O lea ua ou tautino atu e leai, toe toalua le au fai pa pia lea e i i, a o au ia ua fafano ou lima e pei o le fafano foi lele a le toeaina foi lele o Pilato ea po o ai? Ma lou faaaloalo lava.

**FOFOGA FETALAI:** Malo.

**Afioga Hon TIALAVEA FEA LENIU TIONISIO HUNT:** Faafetai. O le pacer plus o lo o i ai pea le Minisita o lo o feagai ma le pacer plus atonu e tali atu i ni fesili mo lea foi feagaiga ua tatou sainia. O le sui mo penisini o lo o aumai i totonus o le atunu, e talitonu e \$51 miliona le excise o lo o maua mai i le suauu lea e aumai i totonus o le atunu. E \$28 miliona o lo o maua mai i le kiso, \$4 miliona o lo o maua mai i le karasini aua o le karasini lea o lo o utu ai ma vaalele. O vaalele i le taimi lenei ua le toe maua mai ai se rebate ona ua suaui foi le Tulafono o vaalele internation law ua le toe aoina mai ai. O lea e laititi ai le tupe maua mai. O le unleaded fuel po o le penisini e \$19 miliona o lo o maua mai a tuufaatasi e \$51 miliona le tupe o lo o maua mai e le matou Matagaluega faaopoopo loa i ai ma le GST i luga o le tupe lena, o le tupe lena o lo o mafai ona maua mai i le suauu o lo o maua mai i totonus o le atunu.

O nisi ua faapea mai o fanua nei ua vave tele ona faatau e le au faipisinisi mai Asia. O le tulaga lea e talitonu e le o se matou, pau le matou galuega o lo o tau fai nei o le Capital Gain e mafai ai ona maua mai si tupe e tau control ai le faatauina o fanua nei. Ma a tatou suesue i fanua nei, o le tele o faipisinisi mai fafo o lo o umia fanua nei, ua uma ona sitiseni Samoa. Ua maua o latou sitiseni i Samoa nei, e talitonu e fai lava si maaleale o lea mataupu ae sei taatia atu pea i le Matagaluega o lo o feagai ma le lesitaraina o fanua. O matou ia a faatau mai faatau atu, o le lelei lena mo matou ia e maua ai ni a matou tupe maua, e toe avatu e gaosia ai galuega o lo o outou talosaga mai ai i le Minisita o Galuega e auala atu i le Minisita o Tupe.

O apa eleni e le lavea matou i le control ina o le vaaiga po o lelei le apa eleni e faaaoga aemaise foi le umi e taamilomilo ai le pusaapa lea i Savaii sau iinei toe alu i Savaii toe sau iinei ae o le pusaapa lava lea e tasi, e talitonu o le Matafaioi lea e fitoitonu ma le Matagaluega o le Soifua Maloloina o le mataituina o le faaaogaina o eleni ia, aua e pau lena o le ituaiga e umi ai ona fealuai ona o le pisinisi o lo o latou galulue i le faatau mai toe faatau atu pe afai maliu o le mamalu o le atunu.

O matou o lo feagai ma le Komiti o le ava malosi, o taimi uma lava e fono ai le Komiti lea e avatu ai e le ofisa o Malu o le Malo faafitauli o lo o tutupu mai tua i le faaaogaina e le tupulaga talavou o le ava malosi lea e tau o le Maso ma le, o a ea isi fagu malolosi. O lea o lo o tupu tele mai ai le faalavelave aemaise foi i e maliliu.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

E tele lava e le faapea o maliu uma ao le tele lava o e o lo o maliliu mai tua i faalavelave e faaaoga ai lava le fagu lea, vodka ia malolosi o lo o fai. O lea lava matou te galalue ai nei ma o lo o fai a matou soa Komiti i le taimi lenei e vaai i le Tulafono fou lea e sau o le Ava Malosi, e control ai le malolosi o fagumalosi e fai. O le taimi lenei o lo o faatapulaa i le 35 40 ma ono tupu le content o le malosi o le alcohol lea e i totonusi o fagu malosi ia. Ao le tele foi o fagu o lo o fai i le alaisa. O lo o faaaoga le alaisa mo le fagu malosi lea vodka lea o lo o faaaogaina i le taimi lenei. O le isi kamupani o lo o i ai i le taimi lenei o lo o faaaoga sao mai lava le ethanol lea mai fafo ona mix lea ona fai ai lea o le fagu malosi lea. O lo o galalue pea le komiti o le ava malosi e fai i le mafai ona taofiofi mai le faamalosiga o fagu malosi ia e ave i tua ma ua taugofie tele. Ua oo lava i le \$10 i le fagu e 750ml pei se fagu pia ua \$10. O lea la e taumafai se vaaiga e tau control ai ia faafaigata ona faatau. O lo o tasi lava le faiga e fai ai o le tuu i luga o le excise tax e mafai ai ona control le faatau.

Ae i ai foi le talitonuga e fiu e taofiofi e taumafa lava e le atunu le fagumalosi. Ae o lo o galalue ai le matou Komiti lea o lo o i ai foi ma le Ofisa o Leoleo, Ofisa o le Soifua Maloloina, Ofisa o le Loia Sili, Ofisa o Tupe ma Komiti o lo o galalue ina ia mafai ona tau foia le faafitauli lea. Ona o la ua matauina le faatuputupulaia, ae talitonu a agai lava i luma o le a taumafai lava e tau taofiofi mai ni auala e mafai ai ona faaitiitia. Aua e le mafai lava ona faapea e 100% e aveesea e tutupu lava faalavelave e le mafai ona tatou foia lea faafitauli. O le lui o lo o tuu mai i le Matagaluega lenei mo le tausaga fou, e pei lava ona tatou talitonu o le agaga lava ia o le Matagaluega o le sue o auala uma lava e mafai ona ao mai ai se seleni. O a lava foi fesiitaiga o lafoga ma tiute ma mea e fai, ae talitonu lava o le faamaoni lava le mea e aupito sili ona taua. Ia te au lava ia, pe o le a lava a tatou faaopoopoga o lafoga sii le VAGST sii le a, a le galalue ma faamaoni le aufaigaluega e tuavale lo tatou faamoemoe.

O luitau e aumai e taua, o le taua ia o luitau, ae pau lena o le vaaiga a le atunu e faamasino ai le matou Matagaluega, po o a mea lelei uma a le Matagaluega e fai o Tupe Maua a le maua le tapulaa, e galo uma mea lelei e fai. Le Pule Sili ma le aufaigaluega o le luitau lena ua avatu ia te outou, aua tatou te loto vaivai. O le a lava le mea e oo i ai le mafai, fai. Aua foi tatou te fefefe e fai faaiguaga faigata, masalo a e alu e sue i le lalolagi atoa lenei se ao lafoga e alofagia e nisi, e le maua. Ae a le itagia foi oe le ao lafoga, e sese le galuega lena e te faigaluega ai, e sese. O le ao lafoga lava ia e tatau ona itagia e tagata, ona e leai se isi e manao e totogi se lafoga. Po o le a la le faigata ma le fita, ia tatou galalue e fai le tatou galuega. E momoli atu ai le faafetai tele i le Pule Sili ma le aufaigaluega.

Ae momoli le faafetai i lau Minisita Lagolago o le o lo o ma soosootauau i le faiga o ma galuega fai. E momoli atu le faamalo i le galue ma le faamaoni o lau afioga i le Minisita Lagolago. E momoli foi lau faafetai i le Minisita o Tupe ma le Pulesili o le Ofisa o Tupe, e tasi le itu o la outou sapelu na e maai i le Tala o le Tupe lenei ua maea atu.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

O le fautuaga faamaai ma le isi pito i le faasologa o le tausaga lenei. Ia matuai slice ai i lalo ia le control lea faaaoga. Leaga a tele foi le tupe e maua, e vave foi le faaalu ae a leai se tupe e leai foi se mea e faaalua aua e leai se tupe. Ae a lelei ona control, ua oo ia matou foi ia lea e manaomia se, e tatipi foi e le aualii ia, a o matou lea eí . Ae ui i lea e leai, e pei ona ou fai atu e faaaoga itu uma e lua o le tatou sapelu i le 2017/2018 ina ia mafai pea ona manaomia. Aua e tulituli pea ia mafai lava ona tatou self sustain i se isi 30 tausaga i lo tatou lava tamaoaiga i tupe e ao mai. E mafua ona o le manatu o le complies lava ma le faatinoga o galuega uma. E momoli ai le faafetai i Matagaluega uma a le Malo e tusa foi ma la latou pitolaau o lo o feagai ai. Faafetai foi i le Ofisa o Tupe o lea o le a aumai a matou x-ray e sue uma ai container ia e aumai i totonu o le atunu, atonu o le isi fesoasoani sili lena mo matou o le a faaaogaina X-tray. E pau lava le fautuaga e fia maua tulou, o se taifau mo tupe, e mafai ona latou sniff ina ia tupe. O le molimau a le Ofisa o Tiute i Niu Sila, e le maua uma e le x-ray lea e i le malaevaalele ia tupe ia e nana atu. O le latou faamoemoega o taifau tulou. O Niu Sila o le matua tele lava o ituaiga X-ray la e i ai. A o lea ua tau mai ia i matou i le matou malaga, o le latou faamoemoega o taifau. Ona o le tele o tupe e ave i lalo o atopau, o isi foi tupe e tuu e tape uma i tino ma o ai, e na o le taifau tulou e mafai ona mauaina seleni ia.

Lau Afioga i le Fofoga Fetalai e pei na o le pau lea o mea sa manaomia ma laga e sui o le Maota i le matou Matagaluega. Faafetai.

**FOFOGA FETALAI:** Malo faafetai saunoa. E manatu e faalemanino i le faafofoga a le Palemene pe afai e fai se saunoaga a se Minisita ae toe motusia ona o le tulaga o le malologa. O lea ua tatou tu lalata i le tatou malologa. O le a tatou alo i le malologa ona foi mai lea saunoa loa le Minisita mo Faatoaga Vaomatua ma Faigafaiva, a i ai foi nisi o sui usufono e fia malamalam atili, e maua foi lenei avanoa i le malologa e fesili ifo ai i tua ina ia tuuitiitia ai faauilavea.

Ou te faasilasila atu ua faataatiae Galuega a le Fono Aoao mo lana malologa masani.

*Na faataatiae Taualumaga a le Fono Aoao Faitulafono mo lana malologa masani i le itula e 10:31 i le taeao ma toe amatalia i le itula e 11:07 i le taeao.*

*Na toe faaauau Felafolafoaiga a le Fono Aoao i le faitauga faalua o le Tulafono Tau Faaofi o le Faatatauina o Tupe 2017/2018.*

**FOFOGA FETALAI:** Ou te faasilasila atu ua toe amnatalia Taualumaga ma Fonotaga a le Fono Aoao Faitulafono.

### Lafo mo le tolopoina

Ua matu i fau le taliga o le sua ma le taumafataga ua ou manatu ua maua foi le faasiliqa malosi i le Afioga i le Palemia ma le Sui Palemia faapea foi le Kapaneta aemaise o le mamalu o lenei Palestene.

E faia le malologa ua maea ona saunoa le Afioga i le Minisita mo Tupe Maua. E i ai le manatu a o le i saunoa le Afioga i le Minisita mo Faatoaga, Vaomatua ma Faigafaiva, ou te muai tapa lau Afioga i le Palemia mo sou finagalo ma se lafo.

### LAFO MO LE TOLOPOINA

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetralai ou te tulai atu ma le agaga faaaloalo e faatu le lafo, *Ina ia tolopoina nei Taualumaga o le tatou Fono Aoao i le itula e 12:00 o le aoauli nei sia aulia le Aso Gafua o le vайасо fou.*

*Faaluaina e le Sui Palemia, Minisita mo Pisinihi Alamanuia ma Leipa, Minisita mo Tagata Tafafao Maimoa Mai Fafo ma le Minisita mo Faatoaga ma Faigafaiva.*

*Na faamaonia le lafo.*

**FOFOGA FETALAI:** O le a faapena ona faatino le tatou galuega, e faamuta le tatou galuega e tusa ai o le lafo faatu i le 12:00 i le aoauli nei ae toe tauaoia i le Aso Gafua i le itula e 9:00 pe a pule alofa le Atua e aulia lo outou soifua ma so tatou ola.

Ou te tapa ma le faaaloalo lau Afioga i le Minisita mo Faatoaga ma Faigafaiva.

*Na toe faaaauau fefafolafoaiga i luga o le faitauga faalua o le Tulafono Tau Faaofi o le Faatatauina o Tupe 2017/2018.*

**Susuga Hon LAAULI LEUATEA POLATAIVAO FOSSIE SCHMIDT (Minisita mo Faatoaga ma Faigafaiva):** Faafetai i lau Afioga i le Fofoga Fetralai mo le avanoa. E manatu foi o lea ua maea palegaauau le taliga o le sua ma ua tatou maua le faamalositino aua le tauaveina o le tatou galuega. O le faafetai sili lea lau Afioga i le Fofoga Fetralai i le Atua soifua ua taitai mai lou soifua manuia lau Afioga i le Fofoga Fetralai aemaise le Fonousu a Samoa i lenei taeao.

Lau Afioga i le Fofoga Fetralai, o oe lava o le ua e faalanumaaveave, o le poutu malosi e tua i ai pouhalo o le Maota Fono o Samoa. Faafetai i lau faatofalaiga ma lou onosai e ala i le tauavagameaina o lenei Fonotaga ua tatou taunu mai ai i lenei taeao manuia.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

E faatalofa atu foi i le paia ma le mamalu o le Maota Fono i ona tulaga faalupe, o outou lava o lupe na faia mai le fufui aua upufai o Malo.

Ua lauila ai ae poupou i toa le fare nai Amoa, ua tulutulu i tao ma soo ona taiao aua mamalu faalagi o lenei Maota. E faatalofa atu foi i le tapuaiga a Samoa o lo o faafogafoga tapuai mai i maota ma laoa, Lana Afioga Mamalu O Le Ao o le Malo ma Lana masiofo, Sui o le Fono a Sui Tofia, ia, aemaise Pulega faatauagai aua lau Afioga i le Faamasino Sili, le Afioga i le Peresetene, alii ma tamaitai o le Faamasinoga. Tainane Ofisa Sili o Pulega o Matagaluega o le Malo ua tatou faatasi i lenei Tala o le Tupe aua le tautuina o le Malo o Samoa.

E faamuli ma le ai se faafetai i lau Afioga i le Fofoga Fatalai i le tapuaiga mau a faafeagaiga taulagi i so o se fatafaitaulaga o lo o nonomanu aua Samoa ma lona lumanai. Ia, lou itumalo, tui maia le mulipapaga o lea o le a fai lo tsao, tapuai maia ma tatalo mai o le a se i velo le uluui asomua aua lo ta valaaui na tofia ai taua e le Malo ta te feagai ma le Matagaluega o Faatoaga ma Faigafaiva i lenei Paeaiga.

Lau Afioga i le Fofoga Fatalai, o lea ua lalafo le upega a Samoa, o le upega fai mai e tautau ae fagota, o le upega e fili i le po ae talatala i le ao. Aisea? E faigata le tautuina o Samoa o le aomamala o lo o tapuai mai. E momoli ai le agaga faafetai tele i tuleiga ma saunoaga, aemaise fetalai oo ua opea i le Maota na outou afea lenei Matagaluega o Faatoaga ma Faigafaiva ma Suesuega Faasaienisi. Faafetai timai, faafetai faailoa mai, faafetai tautua, faafetai faitio mai. E talia ma le agaga faaaloalo, leaga o tu ma aga ia o le tatou vanonofo, e le milia faauu upu pe a tatou talanoa i le tamaoaiga o le atunu. E aumai avatu ona tatou filitupetoa lea, o le a le mea e aoga, faatonutonu folau ai le sa o le atunu mo le lumanai.

O le Matagaluega lenei o Faatoaga ma Faigafaiva, o le talitonuga faavae, o se tasi lenei o faalagolagomaga o le tatou atunu, e le fou. Na faatoa tatou ulufale i upufai o Malo ma le taupulega o le Malo sa tua le atunu i le lauelele, mea uma, fofoga taumafa, tupe maua ma mea e tua i ai le tamaoaiga o le atunu. 1960, 1970, 1980, 1990 e 65 i le 70% o le tamaoaiga, mai le lauelele, faatoaga ma faigafaiva. O le ala lea lau Afioga i le Fofoga Fatalai e le mafai ona manofonofo ai, e ao ona faamanatu ma faamanatu pea i le atunu aemaise le faafogaga a le Maota nei, o le tatou toomaga lea i lenei Paeaiga. Ae talu ai ona o faamai faalenatura ma afa tetele na tatou aafia ai, o lea lava tatou te toa ai ma tatou le mautonu po o fea le mea o le a agai i ai le sa folau o le tatou atunu. Peitai, o le manulauti ma le ioimata o le taumafai a le Matagaluega i le Paeaiga lenei, Samoa, tatou toe foi lava i mea na tatou masani mai ai, o fua o faaeleleaga, o lou ogasami, o mea uma e tua i ai le fofoga taumafa o le atunu, aemaise le tele ma le anoanoai o le oa ma le tamaoaiga la e nonofo i le vaomatua.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

O le agaga atoa ma le faamoemoe o le taumafai atu o au nei o le Minisita ma le Minisita Lagolago a le Matagaluega ina ia toe momoli le feau, toe momoli le faamanatu i le paia ma le mamalu o le atunu o lo o tapuai mai, aemaise lenei Maota ina ia tatou toe tilotilo tasi lava i le itu tau faatoaga. Ua avaga mafaufau o nisi i nisi atinae, ua manatu nisi i nisi o atinae e faigofie ona maua ai le tupe, ua manatu foi nisi i nisi o atinae na o le oso lava i le vaalele fai le galuega toe foi mai maua tupe. Peitai, o le faalagolagomaga o lo o i ai pea le talitonuga autu a nisi o le au suesue popo, Samoa is an agriculture development nation. E 80% o ona eleele o eleele faaleaganuu, o le 80% foi lenei o tagata faifaatoaga latou te gafataulimaina le galueaiina o le eleele e maua ai tupe, mai le tagata laitiiti seia oo i le tagata matua.

O finagalo na laga e sui usufono, e pei na lilifa i le tulaga ua tatou manuia ai nei i le tatou talo, aemaise finagalo na lagalaga e le paia ma le mamalu o le tatou Palestene, o le tatou talo. Faafetai i le Atua ua tatou toe maua se mataiai sa tatou faaletonu ai, ua ova atu ma le 20 tausaga o tatou aafia i le faamai na matua mafatia ai i le lega. 1990-1993, ua leai se tatou tamaoaiga i mea tau talo. Peitai, e le i moemoenoa ai le Matagaluega ma suesuega sa faia, ma e le faaitiitia ai le agaga faafetai i Minisita uma sa taumafaia le galuega ua uma atu le latou taimi, Faaululuga o Matagaluega aemaise le Malo ona o le le moemoenoa ma le le nofonofo ae sa taumafai pea le sailiiliga. Ua a nei lau Afioga i le Fofoga Fetalai? O lea ua tatou maitau le manuia ua tatou vaavaai i ai, a lea ua outou saunoa, ua outou tau mai i le Maota le mea lea ua tatou vaai i ai, ua tele a tatou talo. Ua le tasi le talo, Samoa tasi, Samoa lua, Fusi, Tanumalala, tele isi ituaiga talu suesuega na fai e le Matagaluega ma le Malo. Ma o le agaga faafetai lena, o le agaga lena e le mafai ona tuua ai le agaga finafinai sa faia, ma o le tautinoga ma le taumafaiga a le Matagaluega i le taimi lenei, ia faaaauau ma aua ne i tatou maua ula futifuti i le manuia lea ua sau.

I faamaumauga a le Matagaluega, sa matua leai lava ma se tatou talo e toe aveina i Niu Sila, leai se mea e tasi na toe avea. Le mafai ona tatou toe ulufale ona o le matautia o le faamai o le lega. E oo mai i le aso, sa tatou amata i le tasi, i le tausaga na tea nei ma le tausaga i ona tua atu, lua, tolu, fa. O le faamaumauga o lo o i ai i le taimi lenei, ua 20 a tatou container talo o lea ua mafai ona tatou faaulufale atu i le Malo o Niu Sila. O se tala lelei lea mo tatou. O le ala foi lea o le taumafai atu o le Matagaluega e atiae nisi o faafaiilelega tiapula ma tufatufa atu i le aufaifaatoaga. Ua mautinoa o le tatou taimi lenei e tatou te toe tuitui ai le faitotoa ma tatou ulufale i le maketi o le talo i Niu Sila.

O le Malo Ausetalia e pei ona silafia o lo o faatutugata pea i le taliaina o le tatou talo ona o le tulaga o aiaiga faa-guarantine. Peitai, o le faamanuiaga foi na oo mai i le suesuega a le tatou SROS na mafua ai le mea lenei e tau o le frozen taro, lea ua mafua ai ona ave le tatou talo i Ausetalia. I faamaumauga o lo o i ai nei, ua ova atu ma le 20 a tatou container talu ona amata le faaaliga muamua na fai ia Oketopa i le tausaga na tea nei i Sini i Ausetalia.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

E le i mamao atu nei na taliaina ai e le Kabeneta le ma o atu ma le Afiofa i le Minisita Lagolago e momoli a tatou containers i Brisbane, ua fa nei container talu ona amata. O le vaiaso o muamua atu, le vaiaso muamua o Iulai e tatala aloaia ai le isi a tatou lua containers e agai i Melbourne.

O le agaga lena e tatau pea ona ou oo i tulaga ia ina ia faaosofia pea le onosai ma le faatuatua o tagata faifaatoaga o lea ua lalamua le tatou Malo i le sailia o maketi e ave i ai mea nei. Atonu e i ai nisi o faavaivai loto faapea ua faulalai talo, e i ai foi nisi faapea i fai fai le iloa po o fea e ave i ai mea nei. A o le tautinoga a au ma le Matagaluega, e le gata le sailiga o tatou maketi, ma e le i taitai foi tatou oo i le mea na tatou i ai muamua. 1990 ae oti le tatou lega, na tatou oo i le 40 containers i le vaa, 40 containers talo i le vaa. O le maualuga lena sa i ai le tatou export i mea tau talo, ae tatou faaletonu loa. O lea faatoa tatou talanoa i le 20 containers. O lona uiga, o lo o tele le hope e mafai ai ona toe matale nisi faitotoa mo Niu Sila, Ausetalia ma Amerika.

O le Malo o Amerika ua faatulagaina o le Malo lea e tatau ona tatou faalagolago i ai leaga e lelei le exchanging rate. E tasi le tala Amerika ae \$2.50 Samoa. E tele atu lona faamanuiaga, a o le mea o lo o taumafai nei, o le tatala lea o le maketi e ui atu agai i le USTA i Amerika ina ia faafaigofie ona faaulufale a tatou fua o faaeleeleaga i Amerika. O lo o fai pea le tatou faatalatalanoaga, le Samoa talk ma le Malo o Tutuila ina ia mafai pea ona fusi le fealofaniga lea i le tatou va e mafai ai ona faaulufale a tatou fua o faaeleeleaga e ui atu i Amerika Samoa.

O tatou export mo Pagopago, Tutuila, e tasi le tane i vaiaso uma, ae faamalulu atu i le mea ua tulai mai, e le natia ua agiga foi i ala le tulaga o le taofiga ua oo mai. Sa taumafai lava i le agaga toa aua ne i soona vesi ona ua tipitu faapenei le avatuga o le tatou talo i Tutuila. Sa ou saunia lava le tusi faatamalii i le ma va faafeagai ai ma le o lo o pulea le Matagaluega o Faatoaga i lou talitonuga o lo o i ai le avanoa e fetalanoai ai ae le i faia se faaiuga faapea leaga o lea e tautino e le tatou Matagaluega ma le Malo, o le faamai lea e i ai nei, e leai, leai se mea e popole ai, o le faamai ua leva ona tatou nonofo ma tatou, o le talo u ma le talo pala vaeane le faafofoga a le atunu. E le o se mea fou la, ae peitai ua maua lava e le Malo o Amerika Samoa faamatalaga i luga o le nusipepa ona fai ai lava lea e latou le latou faaiuga. Ae ui i lea, e le aia moo i liu o vaa, e taliu foi ae popoe leaga o le latou Faigamalo ma latou faiga faaiuga, e pule latou. A o le agaga ina ia fai faaiuga i luga o femalamalamaaiga a le Ofisa o Faatoaga i Tutuila atoa ai ma le Ofisa i Samoa nei.

O le faanaunautaiga ua i ai le Matagaluega, pei ua ou taua faapitoa le talo ona o lea ua agai ina toe ulufale i le maketi. O le matafaioi lea ua i ai le Matagaluega, o le faamaoopooina lea o le aufaifaatoaga talo uma i le atunu, ave le lagolago a le Matagaluega i asosi fai talo i Upolu ma Savaii, fai fono i masina uma ina ia mautinoa o le a le tulaga ma le capacity ua oo i ai faatoaga uma ina ia aua ne i toe faaletonu tatou maketi, ia ave foi timaiga i ai i le tau e tatau ona agai i ai le au faatau talo i le va faafeagai ai ma exporters.

23 IUNI 2017

**Tulafono Tau Faaofi o le Faatatauina o Tupe 2017/2018**  
**- felafolafoaiga i luga o le faitauga faalua**

Ua faamaopoopo foi e le tatou Matagaluega tagata uma nei e o atu e export atu tatou oloa i fafo, all exporters, e fai talatalanoaga, o a faafitauli o a mea o feagai ma latou ma le quarantine a Niu Sila, taumafai lea e fonofono atu e le tatou quarantine, faafaigofie fesootaiga, government to government level ina ia mautu ma mautinoa, standard control and quality assurance. Aua e pei ona ou fai atu le paia o le Maota, e le o toe faigofie le tatou ulufale, 20+ tausaga o tatou o ese mai le maketi a Niu Sila, ae tafili saunoa ai Fiti, Rarotonga ma isi atunu. A o le tatou toe ulufale, e le faigofie. E oo atu le tatou talo i Niu Sila, e i le va o le \$8 i le \$7 i le kilo. Na tatou taunu loa, lea ua tatou talanoa i le va o le \$3 ma le \$4 i le kilo. Na pau le timaiga lea e agai i ai le Matagaluega, ina ia tutumau faatasi loto o le au exporters, aua nei i ai le mea lea o le o atu o exporters misa i Niu Sila, aua ne i maua le mea lea o le alu atu o le isi exporter faaleaga tau ua uma ona tatou malilie i ai leaga o le presidence lena o la e ua seti mo le talo Samoa. O le faanaunautaiga, a lelei ma manuia le exporter, o le faamanuiaga lena e toe sau lava le talo a le faifaatoaga lea e faatalitali atu. Ae a tatou o i le o le mautonu, ona ou manatu lea, e sili ai le tele o le tupe a le middle man nai lo le exporter ae fano ai ma le faifaatoaga lea e mulimuli atu, leaga o lea sa taua i le finagalo o le sui usufono. Ia o lea la ua amata ona omai tagata nei e destroy le mea lea e taumafai atu. Ua uma foi ona ou apoapoaia lelei lau Matagaluega, silasila lelei i faiga faavae ma faiga faaletulafono e tatau ona matua tatou tutu faatasi e puipui le mea lea. Aua ne i toe fetauai le talo Samoa ma le talo Samoa. Tatou faasaga e fai le taua agai i fua o faaeleeleaga a isi atunu.

O faamaumauga a Niu Sila e 150 containers i le masina, 150 containers a le Pasefika atoa. O lea faatoa tatou ulufale i le 20 containers, ae pei ona ou fai atu muamua o le laasaga maualuga na tatou i ai, e 40 container i le vaa, o lona uiga e 80 i le 100 containers na tatou i ai. Ma o le ala lena e tatau ona ou faamalamalamaina lelei le mea lea leaga o la e faafogoga mai le aufaifaatoaga ma le au exporters ma i latou o lea e taumafai le mea lea, leaga ua i ai nisi o containers na ave faapea, ae o atu i Niu Sila faatau i le \$20 i le 22 kilo. O se matua faanoanoaga lea na tupu ina ua aliali mai, na ou faatonua le Alii Pule e sue mai tagata ia, e le tatau ona tatou toe tuufaua le mea lea o le o atu o tatou talo faaleaga tatou talo. E tatau ona tatou tutulai lelei tatou te faasasaga i isi talo, ae aua ne i toe faia le mea lea o le faaleaga e le talo Samoa le talo Samoa.

O le faanaunautaiga foi lena na ala ai ona taumafai le maketi lea i Ausetalia, ou te faafetai i nisi o tamalii totoa na omai ia te au, tatou o e fai le mea lea Laauli, Na pau lea o le auala e sao ai le tatou talo i Ausetalia, na o le frozen. Ou te faafetai i le afioga ia Nanai Sua Tanielu o ia lena na muamua sii lona lima, o le a o e fai le commercialization lea e fai nei, lau ma faatau nei le tatou talo frozen i Ausetalia i le va o le \$6 ma le \$4 i le kilo. O se faamanuiaga mo tatou. O se mea e tatou te le i faia muamua.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O le taimi lenei o lea ua ou fai atu ua latalata i le 20 containers o le frozen, lea ua ave nei i Ausetalia, lea e tatala nei i le aso 1 Iulai le isi container agai i Melbourne. O isi containers e lua lea faatoa faaulufale i Niu Sila o le frozen e tatala nei i le aso 11 o Iulai, faatoa faaulufale ai foi lea o le tatou shipment aloaia i totolu o Niu Sila e ala i le tatou frozen.

O le talitonuga lea e i ai e ala i le suesuega na faia e le SROS, o le frozen o se matuai metotia talafeagai mo le lumanai. E vavalu lelei le talo tuu i le pusaaisa, sefe ma secure e le toe oo i ai se siama, e faigofie e te le toe valu talo i le leva o le po na o le tuu lava i le ulo saka tali lau sua. E umi lona life health, e atoa le ono masina o lelei le mea lea, e le tau faatalitali pe tuli lau taumafa ina ia vave ne i te i ua pala lau tagatalo vaeane le faafofoga a le atunu. A o le mea sili ona taua, o le uga lelei lava o le tiapula taatia i inei e faitalia le faifaatoaga po o le a le isi ana mea e fai ai, ae alu lava na o le tino o le talo, ma vavalu uma ma a tatou uli lelei, aua e le faapea e taofia le alu o le talo. Na pau lava le mea ia mautinoa, ia sao ma lelei le tulaga o mea e ave. O le tulaga lena ua ou taua pea le tatou talo ona o lea ua tatou mafuli i ai i le taimi lenei, ma ou te tatalo atu foi i le mamalu o le Maota, ia taulamua a outou Afioga le fesoasoani aemaise le faufautua. O le feau lea na momoli i Ausetalia, Samoa, ia outou alofagia omai e toe lagolago ma faatau le tatou talo.

O le 80% o tagata taumafa talo i le lalolagi lenei, o Samoa i Ausetalia ma Niu Sila. Ae paga lea, e i ai lava isi e o faatau talo a isi. Ia e le tio leaga o lea tatou te fou atu i le maketi, e le tio foi leaga o la e ai filifili le isi faatoa tofo lea i le tatou talo, tasi, lua, salani ma isi talo uma. A o le tatalo faatauanau lea e fai i so o se Samoa o faafofoga mai atunu mamao, faamolemole, faatau fua o faaeleelaga mai le atunu, o tatou, o faaeleeleaga na e toe foi mai lava sau i le Malo foi i le tagata faifaatoaga o lo o nafa ma mea uma. O le tatalo foi lena i le Maota, le paia e o le tatou Maota Fono, o outou aiga, o nuu ma afioaga, o aiga o lo o alaala ma papaaao tautua aitaumalele, tatalo i ai, ia alofagia le faamoemoe. Ma o faalauiloa uma lava na o lea o lo o taumafai i ai le Matagaluega i le taimi lenei, we are the power. A omai uma le 80% lenei e faatau at tatou meatotino, ou te tautino atu lau Afioga i le Minisita o Tupe, e te le toe popole i lau paketi, e matua taumasuasua le tanoa lea na saunoa i ai Pau. A o le faamoemoe lena.

O le tulaga o mea tau fai, sa saunoa nisi e ala i le fai lea ua tatou taumafai i ai, o le fai lenei e tau o le fai Israaelu. E 10,000 tamai fai na aumai, e faamalulu atu le motu tele i Salafai, o lo o tapena le isi 20,000 ma o le 20,000 lena e maua ai tatou fai mo Savaii. Ae na ala ona faamuamua i inei, ona sa tau fai polokalame o faiga paaga ma faatoaga nei o commercial farmers e mafai ai ona tatou tilotilo ma vaavaai po o a foliga o nei ituaiga fai ua tatou agai i ai.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O le tala fiafia, ua uma ona silasila ma tali le sua a le Kabeneta i fai nei, ma ua ave le tatou trial shipping muamua, la e ua avatu i Niu Sila. Tatou te o e tuitui le faitotoa o Niu Sila i mea tau fai, e le tau fai atu le talafaasolopito i mea tau fai. E tiga ona leai ni uafu leai ni lanisi ma mea faapena, ae lau lava i le Tofua ma le Matua le mea sa i ai. Sa tatou tua foi i lenei tamaoaiga o le atunuu. E ui i lea, o faatoaga ma na fao ai e le fai a Audra Dore ma isi atunuu le tatou tamaoaiga.

O tulaga i le faalauiloa, sa faapea e faalauiloa nei le uta fai muamua i le faalauiloa lea e tau fai nei ia Iulai aso 11. Ae ua toe fautuaina au ma le Matagaluega e le pule o le faatoaga e toe taofi laititi lava ina ia mautinoa aua ne i toe toalia le tatou faamoemoe. O le faaaliga la lea o le a fai nei i Niu Sila i le aso 11, o le a faaali ai na o le tatou talo felesi, o le talo faaaisa, o le fai Samoa faaaisa, o le taamu, o le ufi ma le ulu. O frozen commodities na o le a faaauau ai le tatou faalauiloa e fai nei i Niu Sila i le vайaso a gafua nei.

Na saunoa nisi o sui usufono mamalu i le tatou koko, ioe, e le tau fai atu foi. O le talafaasolopito na tatou oo i le miliona pauna sa ave e le atunuu. E le tau fai atu foi i nisi o tatou tulatoa sa i ai, Vaai, Atoa, Aiono ma nisi o le aufaifaatoaga matutua sa faia le mea lena. Ma ou te fiafia e tau atu, o le faamoemoe lena o lea ua toe agai i ai le Matagaluega. O lo o faaauau pea le tatou stimulus package e pei ona ou faiatu, o le ponesi ua uma ona pasia e le Kabeneta le \$4milliona e faasolosolo ai ponesi nei, ma e le i lalo ifo o le 200 i le 300,000 koko fou ua uma ona toe toto. O koko Samoa maoi. Sa tatou faaletonu ma tatou sese i nisi o alii papalagi na omai fautua le mea lea, e le alofia lea foi sa saunoa lava nisi i le saunoaga a le Afioaga i le Aloalii, e sao, e le sese. Ae tatou te le toe tepa i tua na tatou aoao mai ai, e tatou te toe foi lava i le tatou koko Samoa lea sa tatou ola ma soifua mai ai.

O faamanuiaga a le Malo o Niu Sila lea sa outou silafia sa malaga mai le Afioaga i le Palemia ia Leuluaitumua, o lea na ia foaiina ai le tino i tupe e \$4,800,000 NZ o le faatupeina e \$8milliona Samoa. O se matua fesoasoani mo le aufai koko a le atunuu. Ma ou te fiafia e tau atu, o lo o ua faatulaga nei se tasi o pilot programme i totonus o le afioaga o Vaisigano Nu.1, Vaisigano Nu.2 aua e pei o le lua afioaga o le koko lava, e le natia, o le faalagolagomaga lea o lo outou itumalo. O le afioaga ia Tupai Saleimoa Vaai, o se tasi lena o faifaatoaga commercial ua tulai mai i le taimi lenei ua na faamaopooppoa uma faifaatoaga laiti uma i totonus o Salafai ma Upolu nei. Na alu lava ia sue lana maketi, foi mai ma le wilgus chocolate lea tatou te vaaia i le taimi lenei, ma ua matautia le faamanuiaga ua oo mai o lea e i totonus o Asau ma Vaisala. E na te tufatufaina ma faafailelea e ia le koko ma tufatufa atu i le aufaifaatoaga laiti nei ma alu ia e fesoasoani e fai polokalame ma o atu le Matagaluega e fai le fesoasoani. E pei ona ou faailoa atu, o lea e fesoasoani mai le Malo o Niu Sila, o lea e faaumauma pepa, ona faatulaga ai lea e ia o le vaevaeina ma le tufatufaina o atinae nei. Ina ne i faapea po o le a se fesoasoani a le Malo. A o le mea lena o le stimulus package. O le mea lea a Niu Sila o le polokalame lena o lea ua faataatia mo le tatou koko.

23 IUNI 2017

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O Upolu nei, ou te le tau fai atu i le tautua a lea foi tamalii ia Saena Penaiaí

**FOFOGA FETALAI:** Ou te faamalulu atu ma faamalie atu i le saunoaga a lau Afioga i le Minisita o Faatoaga, talu ai ona o lo o motusia le tatou faasalalauga i le atunu e ala i le alaleo pei ona faasalalaugina, o le mea la lea, se i tapena le tulaga o i latou o lo o faapena ona faatinoina le auaunaga lea, ona tatou amata ai lea i sina minute.

O le mea la lea ou te faasilasila atu o le a faataatiae Galuega a le Fono Aoao seia maea ona faaleleia le tulaga o faasalalauga i tua i le atunu ona tatou toe amata lea. Faafetai.

*Na faataatiae Taualumaga a le Fono Aoao mo lana malologa ona o le motusia ai o faasalalauga i le 2AP aua le faafofogaaga a le atunu i le itula e 11:38 ma toe faaauau i le itula e 11:40.*

**FOFOGA FETALAI:** Ou te faasilasila atu ua toe amatalia Taualumaga a le Fono Aoao Faitulafono ua maea ona toe faaleleia le tatou alaleo mo le faasalalaugina o Taualumaga o le Fonotaga, aua foi le faafofoga tapuai mai a Samoa. O le mea la lea, ou te tapa ma le faaaloalo lau Afioga i le Minisita o Faatoaga ma Faigafaiva.

**Sususga Hon LAAULI LEUATEA POLATAIVAO FOSSIE SCHMIDT:** Faafetai atu i lau Afioga i le Fofoga Fetalai ona o lou amanaia o se valaau atu, leaga e tatau lava ona faafofoga mai le aufaifaatoaga lau Afioga i le Fofoga Fetalai. O le toatele o le aualii ia e le o ni faifaatoaga, na ona momoli lava i ai o le feau ae o le faifaatoaga lea ou te manatu tele i ai. O le a toe amata. Ia, ona ou oo mai lea i se tasi o Peresetene o le asosi o le aufaifaatoaga i Upolu nei, Saena Penaia, o se tasi lenei o faifaatoaga polofesa i totonu o le atunu, e le i alu i se iunivesite, he learns by mistakes. E faapefea ona toto le koko, o lea ituaiga trim e trim ai le koko, e faapefea le vaeluaga o le koko, faapefea ona faapala le koko. O ia lea, o se tasi o exporters numera tasi i totonu o le atunu lenei, atoa ai ma le afioga ia Toleafoa Afamasaga, o i latou tonu na o lo o taumafaia le tulaga o le faaleleia ma le toe atiaeina o le tatou tamaoaiga. O le tala faamauina, e le i lalo ifo o le 200,000 le latou foi taumafaiga, e ese mai faamaumauga a le Malo. O lona uiga o lo o i ai le tulaga mautinoa, a omai nisi fale sukalati, aua ua le tasi le fale sukalati. Sa ma i ai foi ma le Palemia i le isi fale sukalati, e omai e tulituli. A o le lelei o le tau lava, masalo e le i lalo ifo o le \$20 i le kilo le tau lea ua i ai i le taimi nei. Ma le tatou maketi lea o le faatautui ae faatau i le aualatele, e le mafai ona faatumu. O Ausetalia e \$10 i le koko lea e 8 grams ma le 12 grams. E faapena foi i Niu Sila, ae ona o tagata o lo o mananao pea e ave le cocoa bean lea e mafua ai ona ave le tatou export lea.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O le tatou popo, e le tau fai atu, o le tasi lenei faalagolagomaga sa tatou i ai, e tele ma anoanoai le sao o le popo ma sua ma le popo tao, le virgin oil ma mea uma o lea ua tatou tilotilo i ai.

I le tala lata mai i le taumafai mai o Savaii, o lea ua outou silasila i ai ua fai le mea e tau o le Savaii popo, apa peepee, apa luau tusi ai le igoa, Savaii popo. O lona uiga o le mea aupito sili lena ona tu matila i le taimi lenei. Na amata i le lua masina talu ai na sau ai foi le isi tamalii mai Ausetalia fai mai, Laauli, ua ou manao e ave au container i Savaii e pack mai lava le popo a Savaii mai Savaii. E faigata tele le mea lea o le omai le uafu fiu e faatali, mamago, taei, faalala. Ou fai atu, lelei, o le a tatou o e fai. Ia, o le galuega lena sa fai ma le Ofisa Sili o Pulega, e ave le container i Savaii, ave le tatou vaa laitiiti lea. Ua 15 container popo ua sau mai Savaii talu ona amata le faamoemoe lea i le 3 masina talu ai. E ui i le fita o le tatou ofisa leaga o la e tau fau le ofisa, e leai se packing house, e faaaoga nisi o potu o le ofisa e monomonono ai, ae faaeteete tele ona o le tulaga o regulation quarantine ina ne i te i ua maua ai se manu po o se mea i totolu. O lea la e tuitui ai le afioga i le Minisita o Tupe ia ia alofagia se vaegatupe e faaleleia ai le vaega lea mo Savaii ina ia mafai ona ogatusa ma finagalo o sui usufono, faalelei ma le uafu ona leai lava lea o se toe fetuunaiga o galuega o lo o fai nei. O lea foi e loloma le faamoemoe o nisi o tamalii ua faaali mai o le a amata ona fai le talo faaaisa mai Savaii. Na pau lava le malosi ua matou oo i ai o le fai o palaka three phase, ae taumafai pea e faaaoga nai mea la e i ai mo le taimi lenei. Ae mo le alualu i luma, tatou te moomia ni fale lelei ma ni mea e faatino ai. Ua ou taua lea tulaga i le manaomia o le fale, ona o lea e faasolosolo i luga le taumafaiga o le pack ina o containers mai Savaii.

Sa saunoa se tasi o sui usufono mamalu i le faataua o le organic certification. O le popo lea ua faatauina ne ii Savaii, sa faatau i le 800 i le tane. Peitai ina ua maea ona certify faatoaga ne ii Savaii, o lea ua faatau mai e le aufaifaatoaga i le 1,400 i le 1,500 i le tane. O se matua siitaga ese le matautia ona ua faatulaga le tau fou o le popo lenei i le organic certification. Ma e tasi lena manulauti o lea e agai e le Mataglauega, o le taumafai e uunai faatoaga faalenatura. Ma e faafetai ai i le wippy o latou nei o lo o taumafaia nei atinae ina ia faaaoga foi e tatou atinae e fai ai faiga faanatura e le tau faaaogaina ai tulaga tau vailaau ma mea eseese.

O le tatou taamu, ufi ma le manioka, e pei ona ou fai atu, sa laga mai foi e nisi o sui po o le a le tulaga o ia mea. O lea ua faaaisa uma mea nei. Ae so o se mea e alu ai le tatou talo i Ausetalia ma Niu Sila, o lea ua alu uma ai ma mea nei o taamu, ufi, manioka, ulu ma fai Samoa. O lea ua amata ona monomonono atu ai ma fua o faaeleeleaga.

O le tatou niu, e le tau fai atu, o le tatou niu o lea sa tatou ola ma soifua ai foi i le tele o tausaga. O le fesoasoani a le Mataglauega o le stimulus package masani, sa faasalalau uma atu, e te resitala i lau \$100 ona o atu lea o le Mataglauega e avatu niu, koko, o kofe, ma fua o fualaau taumafa mata ma o atu asiasiga, e maua lau \$4,000.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

E fa lava tausaga e faagasoai ai le polokalame, e \$4,000 lau tupe e maua, ma o lo o faasolosolo pea le tulaga o le faasolosolo o lea polokalame. Ua uma ona faatulaga le aso faapitoa to niu o le atunuu e ala i le Matagaluega o Faatoaga ina ia faataua, ia tatou toe maua le popo, koko ma le niu sa . Ua outou silafia le tatou fale suau sa i ai, o le tulaga o le tatou export ma tulaga o le popo ma sua sa ave. Ou te talitonu nap au le tulaga tatou te toe foi ai i le tulaga lena, o le uunai malosi o le Matagaluega, ua faatulaga nei le 200 eka i le STEC lena ua i ai tulaga o le tatou faafailelega niu ina ia toto foi a tatou niu sa masani ai, tatou te le toe o e fai le niu lenei, o le niu faafeusuai na ona lapoa ae leai se aano, e oona. A o le niu sa tatou i ai Samoa, e le tele tele ae tutusa lona size e talafeagai ma talafeauga ma le tau e mafai e le tagata ona faataua.

Saunoa nisi sui usufono e ala i le tulaga o vailaau. E sao, e le sese le mea lena, leaga o le puipuiga lena o lea tatou te taumafai i ai, o le vailaau e aumai e faaleleia ai le isi mataupu ae aafia ai le consequence o le isi fua o faaeleleaga, ma e faigata tele ona tatou toe taofiofi i le taimi lenei, ae o lo o taumafai pea le laina e tosi ai le laina, ae taumafai pea ona tatou fesoasoani ai i faatoaga faalenatura ma fesoasoani i le aufaifaatoaga latou te faaaogaina vailaau.

O le polokalame o le SACEP, sa tautalagia e nisi o sui usufono mammal, ou te faamalulu atu lava, ou te le alo i le ata o le lau, ona o lenei polokalame o se polokalame na amata mai le 2012. E 14+ miliona na aumai le World Bank, peitai e leai lava se polokalame e aunoa ma se faafitauli e tele le tauamataina ae sa taumafai foi le Matagaluega ona e le faigofie regulations na omai ma le World Bank, e matua mamafa, e le mafai e saisai mea uma e le faatusatusalia la faifaatoaga international. O nai tatou toeaiina, o lena ua ou fai atu, e masa ni lava tatou, a o le auala lelei na fanau mai ai le mea lenei lea ua atagia i letaimi lenei, ia ola aoaoina faifaatoaga o le vaitau lenei, you treat farming as a career, as a business, ete iloa lelei ai ma e mafaufau o oe o le faifaatoaga e te maua tupe. Aua ne i e faapea o le faifaatoaga tau lava ina maua lau ai, lava, you have to think, o le faifaatoaga e tua i ai le tamaoaiga, e maua lau tupe ma mea e te tua i ai. O le taua lena o le polokalame o lea e faagasoai. E ui i lea, ia o lena sa fesiliglia e nisi le tulaga o le tupe lea e \$6 miliona o lo o i totonu o le paketi. Ia e faamalulu atu, o le tulaga lava tau Tala o le Tupe, o galuega faaauau ae leai se tupe fou ne it e i ua i ai nisi e i ai ni mafaufauga e toe tulai mai. E leai, o le tupe lea e totoe, ua uma ona allocate uma i faamoemoega o nisi o polokalame o totoe, a o lo o talia le ioega a le Minisita o Tupe ma le Matagaluega o Tupe e faatalatalanoa ai le tatou phase two o le atinæ lenei. Ma e tatau, ou te tatalo atu i lau Afioga i le Minisita o Tupe, e manaomia le phase two e faaauau ai le polokalame lenei ne i meaane ua tu faafuasei ona maumau lea o le tele o le tamaoaiga na aumai.

**Tulafono Tau Faaofi o le Faatatauina o Tupe 2017/2018**  
**– felafolafoaiga i luga o le faitauga faalua**

O le tatou polokalame lea o le China and Samoa vegetable garden, faafetai i le Atua, na ou avea le talosaga i le Kabeneta e alofagia le tausaga lea na tea nei, o le polokalame lea, e tatau foi ona faaauau ma o lona phase lona fa lea. Ou te fiafia e faailoa atu, o le vайaso na tea nei na tatala aloaia ai le phase four lea. E \$7.5milliona ua talia e Saina i le tatou polokalame lea e omai ai tagata Saina e aoao le totolina o fualaau aina eseese, fua o fualaau aina, mea eseese. O le taimi la lenei i le phase four lenei, e le toe omai e fai ni demonstration, e o uma lava i le atunu ma aumai uma mea o tunnel houses, o totini, o mea e faataitai ia iloa le matafaioi a le tagata ua filifili o le vegetable garden lana matafaioi e tauave. Ma o le polokalame lena o lea ua faataatia, e iva tagata faapitoa o lea ua omai, e lima mo Upolu, fa mo Savaii. O le isi vaega o le polokalame lea, o le meganization. Sa ou tatalo foi i le Kabeneta, alofa, talia le pepa lea e ave i Saina e aumai ai la masini lea na ou folafolaina atu i le tausaga na tea nei, e aumai ai masini nei e eseese ona faatulaga loa o le a landscape le mea, fola, faatulaga, bedding, palau, faatoa alu atu lava le palau ina ua uma ona aveese maa ma isi mea. O le mea lena na ala ai ona malepe le tele o mea faigaluega i aso ia, ona e alu atu le palau e eli ese ala faapea. A o le taimi lenei i fuafuaga na fautua mai ai au e le saienitisni na sau muamua, fai mai, Laauli, you need to plow, aumai masini lapopoa e elielie ese uma faalevel le mea, faataatia paipa, fai tunnel houses pe timu pe la, sefe mea la e i totonu, sustainable le supply. O lea la e talitali nei ma lou tatalo i le Atua ia talia le mea lena, ma e talia. You already need to me, is in the pipeline. O le agaga lena, aua a taunu mai mea nei, ona ou tautino lea i le tatou Maota, e faigofie le mea lea e augani mai ai.

Sa taua e sui usufono le mea lea i le plow, le sui usufono mo Vaimauga Sasae ma Falealili, ua leva ona i ai tatou palau i uta, e tolu tatou palau la e i ai, ae le se mea a au lou fai atu ia oulua o lea ua i ai palau. O le matafaioi a oulua, o atu e vaai le tatou Matagaluega, o la e i ai palau, totogi le lua \$200, four hours, fai lau galuega. A o palau, e le o se folafolaga, ua faataunu o la e ua i uta palau. O le faaaliga lena ina ia lua malamalamama, e le o se mea faaemo po o ni ata komi, a o palauí

**Tofa Olo Fiti Afoa Vaai:** Lau Afioga i le Fofoga Fetalai o se mea e fia faamalamalamamaí .

**Susuga LAAULI LEUATEA POLATAIVAO FOSSIE SCHMIDT:** E le i lauga le sui usufono lea i lau Matagaluega.

**FOFOGA FETALAI:** E faamalulu atu i le sui usufono o lo o faaui lavaea, e faamalulu atu foi i lau Afioga i le Minisita, masalo o lea ua maitau atu ua tutulai mai sui usufono e fia faaui lavaea. Ua ou manatu foi, o lea ua tatou toai taunu i le tatou taimi manava. E manaia ae faaui ane i tua le faaui lavaea i sui usufono ia e toatolu e tulai mai, maua lenei avanoa e faaui ifo ai i tua le faaui lavaea e faamalamalamama atu, leaga o outou e le o ni tagata faifaatoaga, o le aufai papia.

**23 IUNI 2017**

**Tulafono Tau Faaofi o le Faatatauina o Tupe 2017/2018**  
– felafolafoaiga i luga o le faitauga faalua

Talu ai ona o lea ua tatou toai taunuū i le siui o galuega o lenei aso Fono, e i ai le manatu ae tatou te le i tolopo mo galuega o lena vaiaso, ou te tapa le sui usufono mo Falelatai ma Samatau na te faaiuina le tatou Fonotaga i se tatalo.

*Na tolopo Tauualumaga a le Fono Aoao i le itula e 11:58 i le taeao sei aulia le itula e 9:00 i le taeao o le Aso Gafua, 26 Iuni 2017.*